

先生名朝亮、字季紀、鄉籍簡岸、世稱簡岸先生。清咸豐元年、公元一八五一年、生於南海佛山、公元一九三三年卒於廣州。爲晚清廩生、年二十四、從南海朱九江先生游、學大進、乃畢生從事講學著書、一時出其讀書草堂門下者、濟濟有衆。芸芸中咸以爲禮山之再傳、名重於時、其中尤以同邑之黃晦聞、何蒙夫等爲最。門下復多尊師重道之輩、嘗爲先生身後輯刊其平生豐富遺著、而以尚書集注述疏、論語集注補正述疏及孝經集注述疏、至見精闢、爲後之學者喜讀。先生畢生側重治經、故詩不多作。事略詩章、見朱九江先生百七十年生朝之行誼輯述、福建侯官陳衍主編之近代詩鈔第十四卷。民國己巳版縣志。

客館邑中曾氏草堂

板橋松路入莘村、小住疏林近水園。好鳥呼人多種樹、閒花行影自知門。遠看野色過春籩、倦止書聲話晚尊。笑我邑人還是客、客居初作邑居論。

送友人北上

百年意態何曾異、卻喜聞君有遠行。慷慨古稱燕壯士、衣冠行見魯諸生。風船獨火江神動、驛館寒山夜語清。報道北梅花事好、歸來攀折一枝輕。

韓文公釣魚臺

劉生詩句區生序、笑汝相尋寂寞濱、何事陽山關路遠、竟來同作釣魚人。

寄酬梁大鼎芬

草堂百事不吾知、松竹當門水綠漪、猶笑點塵飛欲到、誰歌防有鵲巢詩。

又

焦頭上客負前身、曲突纍纍告徙薪、曾幾太邱車馬會、萬言宿草意如新。

沃心齋詩草

簡厥良

先生字鈞培、又字夢巖、鄉籍龍江。兄嵩培、名厥修、並爲嘉慶間舉人、棠棣競秀。遺著有沃心齋詩草、覺不覺詩鈔傳世。其詩受許爲味腴而津細、格老而氣豪、堪與張南山黃香鐵並馳聲嶺南云云。事略見咸豐縣志選舉表、詩章見番禺凌揚藻評輯之嶺海詩鈔卷二十三及天津徐世昌編之晚晴移詩匯卷一百二十八。

甘泉洞

散人素居心苦隘、鎮日讀書唇舌乾。甘泉洞古引幽興、首路十里松風喧。春流活活腔際響、新秧剌剌波前翻。平疇歷盡石當面、絕頂坐可三人寬。披襟解帶語移晷、似有琴竹來潺湲。打頭風勢毋乃惡、小雨送我青雲端、懸崖穴出地脈發、一線放溜無朝昏、其用愈大流愈漸、豈必萬馬誇騰奔。由來寒泉比吉士、不食心惻泉非患。所嗟上流苦相值、沔渭一雜難尋源。眼前質乃莫自保、身後行果誰能完。行人指點尚書院、遺趾但見蒼苔痕。江山顯晦本無著、此水竟以公名存。清風吹空水沄沄、勝遊偶發雍門歎。舊聞此水味獨異、負汲恨不攜青猿。作詩調水山神言、余亦辭山還閉門。

行樂昌亂山中

境僻斧聲絕、天高人影微。亂峰青不斷、孤樹綠無依。蹤跡慚蓬轉、逍遙羨鳥飛。山腰有茅舍、補屋待雲歸。

謁張文獻祠

千仞居然一徑通、名臣俎豆至今崇。試將廊廟擎天下、猶著家山闢地功。攬轡頻聞徵草澤、當關曾此失英雄。如何朔雪炎風裏、每向岐途歎轉蓬。

楚庭詩存

何 邵

先生字青門、鄉籍馬甯。清乾隆元年丙辰、公元一七三六年舉人、薦鴻博未赴。有楚庭詩傳世。見咸豐縣志選舉表、詩章見鄒崖逋者鈔讀之嶺南詩存。

遠峰

蒼涼煙一點、隱映入高樓。青與天無際、澹如雲不流。目成芒屨興、心送畫欄秋。太息窮林鳥、歸飛路正脩。

將之惠州與譚澄秋話別

剪燭坐深夜、依依人影秋。鳥啼煙際堞、月上笛邊樓。萬事悲黃葉、三生負白鷗。飄零吾自慣、不必問佳遊。

遠水

一抹涵空翠、晴光散暮涼。煙邊村岸失、帆外海天長。亂火吹漁浦、平沙落雁鄉。夕陽秋脈脈、誰忍賦浮湘。

春日與諸子東郊看妓走馬

東風誰遣鬢邊絲、消盡雄心託酒卮。半醉共吟芳草路、一鞭驚見美人騎。閒來已恨髀生肉、夢去誰忘革裹屍。今日相逢重相感、十年還見射鵰時。

次和汪鹿江大沙塘寓齋同門人林雲軒賦

朱匣涵秋鏡影平、閒居騎省二毛生。誰傳丹訣留顏駐、坐對黃庭叩齒鳴。松愛千尋無佞屈、月歸方寸共靈明。旃檀懺悔從前事、不是煙霞不繫情。

離披殘菊更何如、檢點秋容節序除。塞上已聞翁失馬、濠梁唯有子知魚。逢場處處看烏合、作賦明明託子虛。千載平原絲莫繡、朱門新愛絕交書。

飲虹閣詩鈔

何惠群

先生字和先、號介峰、鄉籍羊額。清嘉慶己巳、與族叔何太青同科進士、官歷浙江新昌知縣、以母喪回里服孝、再不與政、遂長期講學廣州、課徒之餘、常吟詠自娛、惟不傍前人門徑、不主陽春白雪故步、獨事俚辭、開木魚、龍舟、南音風氣、其中以歎五更、益深入民間、傳至家喻戶曉。事略見廣州府志、詩歌見余少飄編之廣東歷代詩鈔。

嘆五更

懷人待月倚南樓、觸起離情淚怎收。自記與郎分別後、好似銀河隔住女牽牛。好花自古香唔久、只怕青春難爲使君留。他鄉莫戀殘花柳、但逢郎按郎與囊諧音便好早買歸舟。相如往事郎知否、你睇好似文君尚嘆白頭。

初更纔報月生西、怕聽林間個隻杜鵑啼。聲聲泣血榴花底、佢話胡不歸來胡不歸。怎得魂歸郎府第、等你喚轉郎心早日到嚟。免令兩家音信滯、好似伯勞飛燕各散東西。縱有柳絲難把心懷繫、可惜落花無主葬在春泥。

二更明月上窗紗、虛度韶光兩鬢華。相思淚濕紅羅帕、伊人秋水爲湖菡葳。使君你風流杜牧堪人掛、合歡同盞醉流霞。許多往事真如話、笑指紅樓是妾家。青衫濕透憐司馬、有乜閒心共你再弄琵琶。

三更明月桂香飄、記得買花同過個度漱珠橋。君抱琵琶奴唱小調、或郎度曲我吹簫。兩家誓死同歡笑、都話個個忘恩天地不饒。近日我郎心改了、萬種愁懷恨未消。心事許多郎你未曉、咁就收你妹桃花薄命一條。

四更明月過雕闌、人在花前怨影單。相思最是令人煩、薄情一去再逢難。顧影自憐和自歎、綠窗常掛望夫山。奴奴家住芙蓉澗、我郎家住荔枝灣。隔水相連迷望眼、獨惜寫書就容易寄

書就難。

五更明月過牆東、倚遍闌干十二重。衣薄難禁風露重、玉樓人怯五更風。怎得化成一對雙飛鳳、會向瑤臺月下逢。無端驚破鴛鴦夢、海幢鐘接海珠鐘。睡起懶梳愁萬種、只見一輪紅日上簾櫳。

### 登鎮海樓

高瞻北嶺俯南邦、獨倚危闌拓遠窗。位置合推樓第一、登臨難得士無雙。雲迷石洞仙蹤杳、水咽花橋霸氣降。惆悵繁華今尚爾、牙檣外處是珠江。

### 題曹子建洛神賦

魏闕長辭過洛川、驚鴻詞賦至今傳。騷人舊怨吟山鬼、才子新愁託水仙。火急高思燃豆日、風流空感贈珠年。分明一片孤臣淚、豈獨傷心白馬篇。

### 蔗境山閣詩集

何棟

先生字卿雲、鄉籍待考、事略未詳。詩章見嶺南詩存並附注爲貢生及順德人。

### 自官山墟買棹入肇慶峽

大科峰頂望崧臺、羅隱濠邊夕照開。風急片帆穿峽出、月斜雙塔渡江來。

### 蘊玉書室詩

何碧璵

先生鄉籍待考、清代國學子。隱居西樵山、建蘊玉書室於白雲洞之間以自樂。簡略與詩一章、見南海余少飄編廣東歷代詩鈔卷三。

### 蘊玉書室

斜日掛寒峰、雲遮萬壑松。湖光半明滅、倒浸碧芙蓉。

春暉書屋詩集

何太青

公字樂俞、鄉籍羊額、清嘉慶己巳、公元一八零九年進士、選庶吉士、歷任浙江於潛、德清、仁和諸縣知縣、擢嘉興海防同知、饒有政聲。晚年居家型族、規範井然。道光年間重修文廟時、寫有重修奎文閣記、洋洋四百餘言。講學州縣、嘗捐贈沙田四十畝與鳳山書院充實辦學經費、嘉惠士林。平生尤尚風雅、著有潛川集、玉壺山房集、春暉書屋詩集。事略見廣州府志、咸豐縣志、編者主編之順德歷代邑人尊孔文選、詩見番禺凌揚藻評輯之嶺海詩鈔卷二十。

題管夫人自繪小像

卷爲徐蘋村宗伯家藏、款署良人出使蒼梧、晴窗無事、偶閱杜少陵日暮倚修竹之句、漫爲圖此。二十六字、模糊可辨。乙亥秋九月、余獲見於清溪官署、絹幅凋零、墨香猶在、真五百年物也。松雪夫婦、敦伉儷之倫、以書畫擅名元代、然讀孝思道院記、惓惓先人之故廬、則夫人有不忍於其親王孫、豈有忍於其君也者。玩其書少陵之句意、美人天末、寄託遙深、藹然忠孝之思、彷彿幀素之外、爰題長句、用誌表微。

蓮花落盡鷗波冷、舊宅淒涼一銀杏。斷縑幾筆寫琅玕、亭亭猶立風前影。煙鬢霧鬢儼神仙、零落人間五百年。我來拂拭開生面、文采風流總可憐。杜鵑啼上冬青樹、良人何事蒼梧去。一行小款認香名、簪花美女傷遲暮。塑來你我共溫柔、惆悵王孫不自由。白雁橫飛天欲遠、夢痕回繞管公樓。棲賢山下數弓地、行吟無限瀟湘意。年年芳草問歸期、爲寫孝思道院記。竹粉模糊淚未乾、餘不溪水鑑清寒。幽懷訴與鴻詞客、莫把崔徽寫照看。

先生字崑璞、鄉籍待考、清代布衣、著有逸遊草。見溫汝能纂輯之粵東詩海卷六十九。

遊半山分賦

薜冠籠短髮、鶴氅坐高岑。雞黍中廚具、松杉滿徑陰。景宜千日對、交以念年深。一入幽閒地、家園不繫心。

浣花堂集

何毅夫

公名懋士、字介園、鄉籍三桂。父友桐、父子同舉清乾隆丙辰鄉試、齊登賢書。毅夫於乾隆乙丑、公元一七四五年成進士、歷官廣西雒容、永安、昭平知縣、皆著惠政、尋以忤於當道被劾、歸里設帳授徒、常以百數十人、出其門者、率有成就。著有浣花堂集傳世、列傳見咸豐縣志、詩章見溫汝能纂輯之粵東詩海卷八十一。

灑江送別葉於湘

七載瘴厲鄉、離家一千里。家有白頭人、倚閭盼遊子。再上陳情書、邇言不中裏。富貴非親心、古人爲貧仕。微祿缺色養、獨慚陟岵屺。身旣不得去、勉強扶病起。勺漏無丹砂、懼以傷遺體。一朝去冠帶、庶幾任行止。言從彭澤歸、還負季路米。感君知己恩、歌詩刻角徵。伏波車中珠、白其爲薏苡。悠悠湘與灑、分流各清泚。別有南征雁、哀鴻避繒矢。答言不敢盡、情寄河之水。

讀陶淵明詩

羲皇不可作、北窗一枕欹。涼風當我襟、如與淵明期。淵明亦云逝、起讀淵明詩。今古長悠悠、無恨不同時。相對有冥契、慰我以遐思。終晉百餘年、運蹇道亦非。束帶良獨苦、五斗徒爾爲。桑竹與良田、願言與世違。鉛華剝落盡、聊以寫憂危。心遠神自赴、力定意不移。

誰能嗣逸響、瓦缶恐不宜、籬菊吹秋香、滿我飲酒卮。

南歸宿款綠山房

北地經年客、歸來別借居。故鄉存旅夢、高枕即吾廬。止屋烏憐爾、營巢燕笑余。綢繆宜及早、風雨意何如。

村居

天入山氣深、遠色藹初暮。采得黃花歸、彳亍不紀步。喜有素心人、攜榼來前路。脫屣邀坐歡、即地隨箕踞。謂此無事時、天地正吾豫。人亦四無聲、東月上高樹。

葭洲詩草

何文幸

先生字勤良、號葭洲。鄉籍羊額、文章憎命、屢試不第、其詩因窮而愈工、因與一時名士黎二樵、黃丹書、張錦芳常往還。妻陳廣遜亦閨秀之傑出、著有葭洲詩草、見嶺海詩鈔。

塾中與虛舟夜話用東坡定惠院月夜韻

虛堂兀坐群星流、喜對良朋向良夜。三春光景若夢中、兩載嘯歌依廡下。藜榻當窗花氣通、玉琴貯月松風瀉。階前零露漬苔蘚、林際棲禽呼匹亞。苦心欲與子堅俱、秘本還從鄴侯借。看君聲價已頻增、笑我浮名曾久謝。幸同聽雨倚高樓、未免看雲戀親舍。論書空擬祖張岳、說劍何曾問曹蔗。百蟲入戶氣尚寒、雙鬢催人老可怕。燈殘歸去煙霧深、獨夜不憂官吏罵。

內子理琴

粧閣夜沉沉、泠然發清響、鑿茲偕隱人、涼月松梢上。

庚子歲偕內子授徒於龍江村塾賦此示之

兀坐科頭對夕陽、一天花落一罍香、客窗日日清齋慣、自笑分明似太常。  
三尺瑤琴爲養真、靜中嘗念倚閨人、等閒一鼓思親曲、不待看雲亦愴神。



宜寐平分夢廿年  
初友和為六  
奇緣五



更風雪乾清夜  
可似蒲團自在眠

亦曾飲了詩三

招枯柳輝牙

積素橋步涉

羊皮漏衫送

而今一季絲句

銷  
鄒崖艾母娘

以始  
榮丹女弟子



# 先師鄒崖先生詩集

意蘭畫舍藏本

一九八五年歲次乙丑仲夏  
弟子張丹敬刊

鄒崖詩集

何翽高

先生諱藻翔、一字梅夏、晚號鄒崖逋者、鄉籍東馬寧、清同治乙丑、公元一八六五年出生原籍、公元一九三零年卒於香港寓次。父家饒、清光緒二年恩科武進士、官營用守備。先生承家學、舉光緒十八年進士、官歷兵部武選司、總理各國事務衙門外務部主事、佐張憩伯駐西藏處理有關內政問題及對抗英國與印度勢力入侵外交事務、辛勞備著。及清室遜位、先生即自京南回、任廣州學海堂學長及爲家鄉總纂順德續志、輯刊嶺南詩存、晚年與增城賴際熙、清遠朱汝珍、南海區大典、區大元、東莞陳伯陶、同邑溫肅、岑光樾等爲香港學海書樓講論國學、使風氣得流傳至今、望能垂之久遠。事略見南海吳天任於一九五八年編著出版之何翽高先生年譜、詩章見其女弟張丹於一九八五年輯印之鄒崖先生詩集。

自序

詩以人傳、人不以詩傳、德業無所成、死後遺詩文數卷、此最傷心事也。辛亥前雅不欲以詩鳴、不得已偶作、率不存稿、每見舊詩、輒憎厭胸中、似別有高妙者、覓之終不可得。朋輩不知我者、以扇箋索錄舊作、苦憶如夢嚙。國變後、棄官南歸、於破篋中蒐集得數十篇、益以比年傷亂之作、彙鈔一冊、殆多有不得已於中者、然祇此區區應酬之作、不免雜出、己自恨其多矣。王之煥所傳不過六篇、裴說行卷祇十九首、古人豈以多爲貴哉。十篇以後、意境大略相似、劉長卿且然、何有於末學、斷乎不足存也。我死三十年後、乃可出示人、略紀行藏崖略云爾、鄒崖逋者自識。

自西樵雲泉仙館至翠岩寺遇雨時光緒己丑前

松徑入翠岩、到寺日未午。迴望七十峰、峰峰皆煙雨。峭壁捫莓苔、陰岩懸石乳。落葉積山廚、亂竹圯廢圃。雲氣裹樹影、瀑聲亂人語。懸崖臨黑潭、卻立莫敢俯。偶然一失足、枯骸

飼豺鼠、雷殷雲泉巖、日暝官山浦。水礁無人春、殘僧只三五。

乙未三月題江孝通畫象峰歸趣圖并用其韻

背山面海村成環、桑塍鱗櫛南沙灣。圭峰嵐翠相揖讓、匡門潮汐時往還。漁山樵水無阻礙、桃源何必非人間。豬魚肥腩蝦蜆賤、春社屠狗牛蹄殷。蠶月機聲出深巷、繰絲浴繭羅鄺闌。雨簑雲屨青布鞵、風俗醇樸無嘲訕。有田不歸胡蠹蠹、三年衣袂京塵黷。晨晞夜暗竟何補、乾跳坤踔生多艱。鸞田質宅擲虛牝、抱牘畫諾污朝班。忍爲太倉添雀鼠、枝官便請從余刪。去年遼海氣滲躓、鷹隼狼睖紛梟瞋。飢虎獻媚強飼肉、屈腰撓臍驕豺豸。漫搏牛車破蟻蝨、敢以硝黃投羸羸。十羊九牧適擾擾、一樓兩雄常嚙嚙。毒蛇螫指抽刃斷、痛定回思捫殘瘢。兀天颺浪丹石觸、收帆轉柁爭瀧灘。日碑留漢有心者、對我政府砭痲癱。三千年來神聖胄、不應貧弱淪墨蠻。反令外人憂中國、諸公充充當何顏。爬羅新法亦皮傳、人材皆窳無雄姦。我生褊急坐愁歎、中宵羈緒長鰥鰥。白水棉湖有宿約、苦爲六鑿相牽扳。逝將手版投丞相、酥醪訪道羅浮山。遠官例作掛冠語、吾出幽憤寧欺謾。行年三十圖歸隱、腰腹空大真疏頑。藝瓜種菜畢吾事、頽然天放無拘閑。妻子督耕象峰隴、錢鋤白柄誅榛菅。芋魁飯研老瓦缶、高堂雞黍供寒慳。屋前芭蕉三百樹、屋後雜花紅爛斑。日長晝靜讀書倦、欹枕風瀑聞淙潺。長林豐草縱孤往、羈猿長脫金油環。整頓乾坤望吾黨、天狗睽睽狼弧彎。

贈別張憩伯（蔭棠）同年

看花躍馬去年事、贈畫留詩他日思。海外功名成破甑、浙東風雨送靈旗。只今惘惘向何處、莫便堂堂負夙期。若過棲霞山下路、一尊爲醮岳侯祠。

庚子六七月間圍城中雜感（義和拳與八國聯軍入侵事）共十二首錄一

三百年天下、安危在此行。有懷唯國難、未敢惜身名。倉卒開邊釁、艱虞屬老成。一生和戰

史、功罪後人評。時李鴻章奉命入京負責議和遲遲未到

七月二十七日得西狩消息時八國聯軍分守景運門

翠華聞道出居庸、河嶽風雲護六龍。苜蓿萬家燕市馬、觚稜一點薊門烽。淒涼夜半滹沱飯、寥落秋深景運鐘。宰相遙充祈請使、都堂談笑酒千鍾。

丙午星洲船上見赴荷蘭華工惻然口占

瓦盆草席苧衣單、醃菜乾魚飯一簞、莫纂黑奴籲天錄、牧豬兒有甲必丹。華人在異族統治下任官職者曰甲必丹

聞海客談詔旨保護回國華僑有感

少年無賴走南洋、海禁森嚴詔捕亡、白髮重談嘉（慶）道（光）事、田園無地感滄桑。

七月十二夜過婆羅洲海峽贈船主

月黑天陰渡海腰、婆羅洲外五更潮。白頭浪打舵樓過、風雨篝燈立鐵橋。

印度海口

灣迴岸轉氣龍蔥、七十二沽形勢同、無量恒沙無量劫、夕陽遺甃故王宮。

自大吉嶺入哲孟雄部馬上口占

漠北峰巒萬馬奔、西金鎖鑰控烏孫。萬山嵐湧雲成海、驚瀑雷鳴石有門。泰華一丸伸右臂、江河兩派入中原。恒沙無量胡僧劫、興廢何因問世尊。

唐那山口

喜馬峰頭作重九、四千年來得未有。壯遊應在玄奘前、山賊不居靈運後。咳唾落地成江河、蜿蜒五嶽皆培塿。地平線已沒西極、天樞夜不見北斗。凌晨雲氣排海出、白晝怪風吹石走。

百道飛泉出樹梢、白沙銀礫聲細吼。盤渦激閘石凹深、古澗斷冰鐵寸厚。壞碣榛莽竄狐兔、陰巖燐骨飼鷹狗。英軍入藏時戰骨狼藉中亞屋瓴天下脊、北徼屏幃土囊口。白頭胡賈出波斯、歐亞孔

道通樞紐。天竺迤北蔥嶺東、宗教佛回居八九。神奈山頭十字軍、蒼頭突起破枷杻。吁嗟乎、二十世紀世界秘密國、中原鼾睡無人守。多少地學探險家、足跡未到天窺牖。我來一萬六千尺、雪山森峙驚奇陡。岩腹雷火燒僵松、石罅人臂攫枯柳。斜緣險仄不容腳、下瞰巉嶽敢回首。磨驢旋轉蛇盤上、東歪西倒誰援手。十步九喘竹筒吹、倚樹小憩立難久。下坡勢比上坡險、石破馬腹人折肘。山頂湖迴數十里、野堯黃白成淵藪。魔鬼刻石貌猙獰、馬蜞噉人血盈缶。黃昏初投喇嘛寺、鰲面皸裂驚奇醜。穉魯莊嚴繡佛龕、且喫酥茶飲蠻酒。

色拉寺晚望寺在拉薩之北寺僧三千餘人與別蚌寺甘丹寺並稱三大寺另有雙忠祠

三千五寺塔黃紅、六十八城煙雨中、欲訪康（熙）乾（隆）舊碑碣、老僧遺事說雙忠。

贈翠微山龍王堂海覺禪師時已酉六月

覺師勸我去爲僧、我亦曹溪棒喝曾。天地何情霜後葉、河山不定塔中鐙。著衣喫飲無非道、擔水搬柴病未能。尚憶鐵龍橋下過、丹珠殘疏滿行滕。

題所藏李子長畫羅浮第五峰圖

風雨漫天胡不歸、雷光一線暝行微、釣竿欲掛鐵橋樹、卻恐浮山峰夜飛。

哭義僕譚芸哥痛其一夕暴病死謹賻百金爲備棺衾

匹馬相從二十年、曾隨天竺學參禪、歸裝只有羊裘在、宣武城南買墓田。

辛亥九月十九日作時有排漢之謠京官紛紛挈眷南下

昨夜見微霰、檐間棲鳥稀。看雲知道力、掃葉悟天機。此亂從何說、無家那更歸。見人論盜道、當時外務部多人以葡萄牙王近遜位行新政爲中國好榜樣尚憶故山薇。

壬子人日玻璃廠晚步

十日春陰感不勝、夕陽殘雪照觚棱、虎坊橋畔布攤子、猶鬻黃龍舊誥綾。

江村即事

春半秧塘放水遲、東風吹綠上桑枝。退潮斷堰分蠓女、過雨橫沙撈蜆兒。水馬偶觀知進退、陂蛙狎聽忘官私。廿年車馬京塵厭、一棹江雲信所之。

餘生一首

頗幸餘生免采薇、未應好亂敢天遺。看星夜半思流涕、聽葉霜前已見微。倦羽關山何日息、破舟風雨不知歸。挑燈重讀頭風檄、尚覺人間有是非。

醉後寄瘦菴

劫雨藍風夢裏身、從今當作太平民。頗羞謝掾還尊孔、只惜劉棻託美新。半畝菜園心且住、一盂豆粥食兼旬。鄴都浩浩菩提道、省識德彝亦士人。

甲寅人日宿九龍山人家題壁

綠裏園庭自一家、年來種菜是生涯。五更枕上關心事、雀啄新畦豌豆花。

勿庵以余有喪明之痛寄詩慰唁次韻答之（按先生長子鴻暉溺於海次子鴻達死於美洲）  
勸除煩惱愛根纏、恍讀南華第一篇。老眼已乾滄海淚、自鈔般若過餘年。

乙卯七夕

婦織夫耕劇可憐、兒孫此債苦難填。神仙亦有人間恨、只悔當初貰聘錢。

登宋皇臺

宋皇臺上嵯峨石、斷瓦零磚不可識。一坏猶是漢江山、三字空留元筆跡。回憶六龍南幸時、江潮失守更移師。甲子浪高飄海艦、伶仃洋渡懷孤兒。官富鹽場一荒島、蒼黃猶稱行在所。入幕參軍趙玉淵、毀家輸餉馬南寶。小朝廷寄蛟螭窟、築臺瞭敵臨溟渤。龍湫淘恨銷秋煙、鶴嶺招魂弔寒月。傷春弔古此登臺、興亡豈爲昔人哀。金主墳荒成祆寺、楊侯廟破委蒿萊。

登高四望非吾土、二王村有樵漁來。

七夕悼亡廿四日始聞耗適航路阻不得歸

默坐如有失、中宵忽放歌。艱難有今日、後死更如何。累汝持家苦、知余隱惡多。石塘聞梵唱、悽感動東阿。

追懷李洛譜師孝廉師乃大良人少從朱九江陳東塾受業

潏潏碧鑑水、奔流入大門、巍巍舊寨山、回抱羅兒孫。靈秀毓耆傑、朱陳有淵源。史漢讀爛熟、書易從討論。詞賦信翩翩、踐履乃醇醇。至孝竟無後、著述焚不存。三年六榕寺、哭寢無諛言。

七十

七十懸車當告休、天心不死屬譙周。殘棋險著那能避、完卵傾巢寧久留。月俸南齋書畫賣、薄田陽羨子孫謀。落花春夢憐身世、桑海茫茫滄趣樓。

庚午正月十三日學海書樓祝嘏

江湖望闕祝釐辰、白髮遺黎尚幾人、驚憶外臣牌帶進、上書房裏獻香檳。

小女寶箴鄉間來書漫錄其語

果木如人有盛衰、開花怕遇惡風吹、八哥（鳥名）樹上相呼語、楊鎮今年無荔枝。

自題道裝小照贈張丹女弟

喧寂平分夢廿年、郎官和尚亦前緣、五更風雪乾清夜、可似蒲團自在眠。

又

亦曾馱馬訪三招、枯樹槎牙鐵索橋、殘疏羊皮滿行篋、而今一筆總勾銷。

鹽薇閣詩鈔

何程氏

程氏名字與出生籍待考、乃何翹高先生元配、育三子一女、長日鴻暉、仲日鴻達、並英年早逝、季日鴻平、曾任廣州嶺南大學西關分校校長二十餘年、女日寶箴、有林下之風、俱能吟詠、蓋得自程氏之相夫教子有方所致。公元一九二五年、程氏夫人卒於鄉、時何翹高先生正在香港講學與懸壺行醫濟世之際、值當地海員大罷工、交通一時隔絕、音書阻塞、竟二十四日而後聞耗云。詩章見鄒崖先生詩集附錄、事略見何翹高先生年譜。

蠶婦詞光緒癸未作

大婦竈側迎蠶孃、小婦洗手羅酒漿。中婦窈窕獨豔妝。東南宅角揄紅裳。喁喁私祝知何語、五畝餘地千株桑。蚝蟹蚘蚘盈籬筐。屋無鼠兮田無蝗。田婦飼蠶如飼子、蠶飢則憂飽則喜。初眠嫩小畏風寒、門遮蔽席窗糊紙。夏來三日雨不止。桑葉黃落傷潦水。米價爭同桑價起。搜盡蠶匣典簪珥。徬徨東市買桑歸、箔上蠕蠕幾瀕死。一月十日不梳頭、飼蠶纔罷饁西疇。農夫朝朝常薙草、農兒暮暮常牧牛。終年辛苦盼蠶熟、三眠四眠齊上族。繭成縑絲織綺縠。五色爛斑艷奪目。打門租吏來敦促。泣抱新絲墟市鬻。鬻作豪門歌舞衣、田家原不稱此服。淮陰釣臺懷古得臺字

茫茫煙水釣魚臺、落拓王孫信可哀。渭水得璜空有夢、富春傲世愧非才。斬蛇真主雖相遇、烹狗功臣亦自裁。若使名成便歸隱、五湖應繼范蠡來。

消夏即事

春天晨氣雨初晴、陸羽茶經細品評、亞字闌干人字柳、碧紗窗裏讀書聲。

偶成

蟬聲初轉碧梧枝、春去闌深了未知、滿院綠陰涼似水、只因多病久無詩。



七夕

耿耿銀河月一鉤、誰家姊妹不登樓、人間多少痴兒女、夜半憑肩看女牛。

輓龍太常蘭移先生

久仰龍門未識荆、空中旗鶴忽相迎。豈徒遺愛私吾邑、知有忠魂繞帝京。半世投簪仍報國、疆臣借箸共籌兵、藩封受侮邊塵急、遽壞南天萬里城。

前題之二


噩耗傳來士女傷、粉榆聯袂奠椒漿。嶺南漫詔科名盛、身後誰知姓字香。獨對人琴懷子敬、只應福壽數汾陽。描花恰值工夫暇、也學檀郎撰輓章。

畫竹與鄒崖夫子聯句程起句何接句

與可先生性愛竹。東橋盡目看不足。日暮歸來自嘖蹙。此君不見使人俗。渭川千畝胸中熟。興酣提筆神且速。龍文鸞節咫尺縮。吮毫筠粉落殘馥。春芽怒迸生意蓄。個個向背無重複。左右琅玕驚滿目。紙上煙雲起嶮谷。室生虛白懸數幅。素壁風吹戛寒玉。有時秋雨窗下讀。疑是瀟湘妃夜哭。陡然老幹青雲矗。千竿萬竿幻盤曲。古槎橫掃毫尖秃。縱筆揮灑暢所欲。蜷節怒作蛟龍伏。高巢想有鳳凰宿。墨汁淋漓滴翠麓。又疑露滴清響續。安得淇園買茅屋。茗盃芸籤伴幽獨。座中佳士接芳躅。但願食筍不食肉。

鄒崖夫子爲朱九江先生募置祭田感

落日九江口、風飽帆如馬。村墟魚市散、繫纜石橋下。導登禮山堂、嚴祠臂堪把。桐子落廊廡、桑葉拂簷瓦。如聞講經聲、溜溜石泉瀉。不媿儒林鄉、誰立樂公社。盧（文毅）駱（文忠）交章薦、鄭朱一爐冶。人師古難得、遺書今莫寫。一盞薦山芳、弟子歛南雅。舊德食先疇、孤寒庇廣廈。鄒崖篤風義、庶以勸來者。



蘭愷公遺象

何國澧

行書五言詩軸



景星照堂詩存

何國澧

先生字定怡、號蘭愷、鄉籍水藤、清光緒乙未、公元一八九五年進士、翰林院編修、南歸後掌教鳳山書院、春風化雨、陶育多士。鼎革後以遺老終。傳略見民國己巳縣志、香港何厚本堂會刊創刊號、詩章見南海余少飄編之廣東歷代詩鈔卷五暨順德歷代士林書畫專集。

贈東華醫院前後董事諸公

人人黃帝之子孫、今可從流溯其源。前朝嘗草承少典、中央王土號軒轅。冕旒在上裳在下、股肱爲輔首爲元。性命陰陽咨岐伯、天時人位定榮猿。內經所重內治亟、素問預示素王尊。百年久道傳斯業、萬世永賴資其原。豈無蚩尤起涿鹿、分疆畫井踞雄藩。幾經隸首容成之歷數、終不能如末世欲燬扁鵲之方。而滅仲尼之門迄於今。心腹腎腸時或疾、君涇佐使猶長存。我似子由方雨病、院有良醫過我言。斯院逢庚井養不窮重三巽、周甲萬物資生用六坤。其間水旱癘疾憂民戶、而且劍履干戈達帝閭。幾費雷公心苦畫、不教雲旅手能翻。蔽芾甘棠思其德、綿綿葛藟庇其根。概由德哲垂來者、多以人力助天恩。時過六旬年歲屈指算、今際九秋風露洗頭盆。欲留紀念誌盛典、高文典冊徵文園。我已杜門二十載、客不滿座酒空樽。木椅寒松氣不煖、才盡筆花眼又昏。若著龍門扁鵲傳、此事還須推之太史溫。

贈郁崑三兄

丹成神仙去、井冽寒泉食。甘味無比倫、華池咽玉液。脩岩如長廊、下有流泉注。山中古仙人、步月自來去。

河清逸響

何國溥

先生字定瑤、號惠庶、鄉籍水藤、清光緒邑庠生。嘗游簡岸先生讀書草堂。與兄國澄國澧有何氏三鳳之稱。國澄字清伯、光緒庚寅、公元一八九零年進士、官歷內閣中書、國溥既

邃經傳、復畢業高等警察學堂、通於武備。哲嗣叔惠幼惠、擅詩詞書法、香江設鳳山藝文院、啓迪後學、不忘先德也。事略詩章所見、與其兄國澧同。

留別讀書草堂諸君子

六經華夏自千秋、巨眼曾無五大洲。白鹿山中方說士、爛羊關內盡封侯。分齋深辨胡先學、報國長懷杜老憂。不斷雞鳴芳草地、蕭蕭風雨別吾儔。

送春

歸去聲聲泣杜鵑、曉鐘初動五更天。最憐小住纔三月、爭奈相逢又隔年。舊夢已婆心緒惡、浮生易老髮華顛。待將綠到王孫草、匹馬東郊好著鞭。

環溪詩鈔

何松

先生字古巢、鄉籍羊額、著有環溪詩鈔、簡略與詩一章、見南海余少飄編之廣東歷代詩鈔卷三。按咸豐縣志選舉表所載、清乾隆間進士。

白雲洞

峭壁孤峰削、泠泠一水長。空中常作雨、天半亦流觴。古洞迷春色、曇花濕石床。杳然人境外、身在白雲鄉。

布衣詩草

何琮芹

先生字渭璜、鄉籍待考、清代布衣。事略與詩一章、見邑人胡源子流所輯梁荔夫鈔存之鳳山詩粹。

反太白詩

剗卻君山去、洞庭秋月高。只愁風雨夕、何處泊漁舸。



先生別號櫻菴、鄉籍羊額。先後從名孝廉族祖南臺先生、同宗宿學何泰交先生受業珠江、以家貧奮志、力學有成、赴考得名舉廩生、爲秀才。歷任順德、番禺、瓊州、幕府主理文牘及順德中學教席、因緣而北遊五省、廣登臨賦詩之願。清末移家海隅、受聘巨室西賓及主講香港育才書社漢文、復設絳帳。乃從其游者、先後逾千人、以知名士林、世稱櫻花先生。歲癸亥、公元一九二三年、先生之門人輯集其散佚之篇、詩作、書札、說薈、文鈔、都爲一集、曰櫻花集、付梓傳世、以紀師恩。詩凡六十餘首、擇錄如下。

## 寄懷香江諸弟子

黃鶯住久親復疏、枝頭惜別將奈何。十年作客異鄉土、鵝潭鳳嶺多風波。祖宗坵壟不可棄、垂老浩然有歸志。朝趁輪船晚汽車、落落身輕如插翅。長堤楊柳春復春、十丈紅塵眼底新。珠娘歌舞自千古、南征北討徒紛紜。我家舊是紅梅洞、胭脂豔入孤山夢。三月歸來已落英、橫塘老鶴時相送。平明策杖上龜岡、攜得雛兒掃墓忙。老天未免惡作劇、雷公電母東風狂。墨雲如墨雨如箭、冷水澆背泥撲面。父子相抱蹲空山、世界陸沉殆一線。笑我千錘百鍊身、年來更事老風塵。國憂家難鑄膽汁、區區挫頓安足云。寄語香江諸弟子、青年努力向書史。救國寧爲楊太真、覆巢莫學孔文學。丈夫處世當習勞、酸風苦雨無時無。會當馬革裹屍耳、鬱鬱牖下非吾徒。嗚嗚汽笛一聲起、書劍飄零吾至矣。談經論道復依然、山茶開花梔結子。師生畢竟兩情深、絃歌海外有知音。一朝破壁共飛去、神龍掉尾聲轟騰。

## 己酉除夕寄懷同學龍氏諸子寄君白

灼灼濃桃別豈堪、深情如水試相參。公門森立姿初秀、露井新開色大憨。根柢雖非天上種、芬芳不吝笑中探。陽春聽罷難爲和、感對無言只自慚。

爲友人和桂溪潘資政七十老翁

壽星前度吐光芒、贏得名山日月長。桃縣家聲留豔蹟、菊籬風味貯詩囊。古稀剩有蒿時淚、世變憂深舉國狂。桂水已成招隱處、有人獨立感蒼茫。

和藍田書塾即景

自覺詩書氣味長、書聲裊裊繞楹樑。絳帷風靜饒真趣、彬秩居然君子鄉。

又

纏綿風雨未曾收、籬豆酸風一段愁。萬慮乍縈無自解、琴書自許足消憂。

又

紅棉深處宿棲鴉、苜蓿闌干放晚花。萬籟無聲明月夜、孤檠掩映讀書家。

君白以紅棉詩見示倚聲和之

石家金谷數名園、崛起珊瑚千百尺。五嶺而南我獨尊、櫻花對此無顏色。夕陽晚節泣殘紅、將軍畢竟能流血。公才不請大王雄、斯人斯樹稱奇絕。一朝衣被遍單寒、高風矯矯真豪傑。

和獻庵先生

聚首無多又離別、黯然風雨近蒲節。不期此夕又重逢、小齋夜話茶煙歇。爲念鄉關殊踟躕、爲言離別歎欷歔。千金一刻催殘漏、他時兩地各相思。寄懷俯仰天地寬、鏡濠景物何娟娟。蕭郎久別章臺妓、一時傾蓋西湖船。我亦愛卿卿愛我、安得金屋藏嬌所。此後良朋與美人、詩酒賡酌鶯未老。

飛祝檀香山程鐵崖先生壽

曼倩蟠桃欲泛棹、江山一盞醉流霞。伊川明月先生宅、鐵嶺英風處士家。腕底文章驚震旦、眼前樓角敞中華。此日胡姬齊上壽、金樽檀板祝鶯花。



舊紋女弟子歸濠鏡祝其太夫人壽貽我尺素詩以答之

濠鏡依依日暮雲、傳來璫札綺成文。麻姑玉盞迎王母、熙鳳斑衣祝太君。可有新詩娛杖履、合將名畫贈釵裙。此行否憶樊川夢、一樣鄉心兩地分。舊紋外家有園名小樊川乃余所題

寄陳君硯池

學海淵淵數白沙、天生骨幹自槎枒、帶人春夢阿嬌屋、訪我天涯處士家。第一賞心江上月、無雙韻事客中花。紅衙玉帳都無分、詩酒因緣度歲華。

清明節憶聽公

無多知己亂離中、剩有天涯一放翁、惆悵未風寒食節、杏花如雨落殘紅。

又

半畝池塘一角山、紅裙倭女自蕭閒、支那風景都無著、千歲花魂尚有壇。

又

女兒聰慧勝男兒、亦課鶯花亦課詩、名士風懷仙態度、一燈書味兩心知。

無題

寥落空山獨抱琴、更無世外覓知音。菊留晚節撐孤影、蘭向秋風展素心。一瞥紅塵原是夢、廿年綠葉已成陰。鳳城省識桃花面、人海差池直到今。

又

又報新秋入夢時、江湖蕭瑟不勝悲。風高雁唳排空遠、月黑雞聲報曉遲。摘殘茉莉兩三朵、數到芝蘭四五枝。知己不來天欲雨、挑燈猶製遣愁詩。

仲公遺稿

何仲輿

先生字其敬、鄉籍待考、事略與詩章、俱按龍山陳緯南公手稿之清詩拾萃所載、有「甲戌進士、比部官銜、」云云。

詠文信國

返里黃冠說本非、首陽無地更安歸。受恩敢試秦廷筑、偷息誰貽周室薇。叛服兩難何位置、死生一決肯依違。崢嶸大節新朝諱。史筆從諛要闡微。

自題筆篋

毛錐子、毛錐子、爾胡鬱鬱久居此。廿載寒窗供驅使。爲我沉埋吐鳳才、行將老此管城裏。爾不負吾吾負爾。

珠江凝碧舫

雨晴斜月轉清光、花裏行來影亦香、相伴片時偏又去、不知深夜爲誰忙。

見星廬稿

林辛山

先生字聯桂、鄉籍待考、按龍山陳緯南公所遺手稿之清詩拾萃所載有見星廬稿詩一章。

運河雜詩

糧船高如樓、貢船大如廠。客船廁其間、小者如甕盎。客船遇糧船、客船不敢上。糧船遇貢船、糧船不敢搶。鑼炮兩隄迎、堠柝中夜響。貢船壓糧船、糧船壓客槳。客槳無地容、遁入蓮花港。余時踞貢舟、一笑成遠想。

五山草堂詩

龍令憲

先生諱錫恩、字詔綸、號清暉散人、鄉籍大良、生於一八六八年、卒於一九三八年。乃清嘉慶二十二年進士、官歷翰林院編修、侍講、山西學政龍元任之孫。先生爲清末監生、再無志仕途、以寫字讀書終老、公元一九零八年刊著有五山草堂初編二卷。事略詩一首、見南海余少飄編之廣東歷代詩鈔卷五、事略書法、見順德市博物館藏順德歷代士林書畫專集所載。

勸君酒

勸君酒、君莫辭。有酒不醉須何爲。何必椎牛與炙鯉、及乎水參之山脂。勸君酒、君莫辭。一日復一日、今時非昔時。羲和驅白日、六駕駮青螭。雖有賁獲力、又安能倒挽而使之返馳。勸君酒、君莫辭。智者枉勞慮、醒者役神疲。何如醉入黑甜鄉、不知世事之推移、歡君酒君莫辭。

蕉雨軒稿

龍吟齋

女史鄉籍大良、出身書香門第、玉隕於清光緒三十年、身後其弟龍令憲刊其詩作曰蕉雨軒稿。見南海余少飄編之廣東歷代詩鈔卷四。又見己巳版縣志藝文、所載作吟香。

端午清暉園即事

瘦損腰圍恨未休、每逢佳節懶登樓。事妨有變頻仍夢、心已如痴總是愁。綠葉成陰春又去、青波依舊水長流。時光感觸多惆悵、獨倚闌干思更悠。

菊枕（見龍山陳緯南手稿清詩拾萃）

落英囊得枕疑仙、時有微香透鬢邊、最是五更殘夢醒、誤人猶道墮花鈿。

天章閣詩鈔

龍應時

先生字懋之、號雲麓、鄉籍大良、生於清康熙五十五年、卒於清嘉慶五年。清乾隆十六年進士、官歷山西省靈石縣知縣、年八十五卒、遺著有天章閣詩鈔五卷、事略與詩、見順德市博物館藏順德歷代士林書畫專集。又見番禺凌揚藻評輯之嶺海詩鈔卷八。

戊午初秋錄出都述懷舊作呈愛日賢世講

三年又醒春明夢、萬里重揮遠道鞭。豪氣漸隨花事減、歸心忙到馬蹄先。一官潦草緣謀養、百計粗疏悔少年。笑指國門頻戀別、就能重到恐華顛。

新悟

春半枝頭綠葉添、濃雲送雨洒廉纖、戎葵漸放茶蘼謝、一院清陰上翠簾。

橘叟題畫詩

龍世權

先生字巽儀、別字擢村、號橘叟、鄉籍大良、清代監生、曾任廣西試用巡檢、工書擅畫、尤擅寫梅蘭竹、生於公元一八四一年、卒年不詳。事略與詩見順德博物館藏順德歷代士林書畫專集。

自題白梅綠鸚圖

梅叢間竹幾生修、十月初開占嶺頭、丹目綠衣空是望、有無盡放到瓊樓。

贈毅甫妹倩七言聯

苦心未必天終負。

辣手須妨人不堪。

此古格言也非深於閱歷者不能道之爰將此聯句書之以移贈蕉厂龍世權書年七十有九

此在極言也 昨漢行同歷者 非結道之良機 以快其句 善之 以益 願

苦心未必天 終負

秋浦秋清 試月 度矣 語不 謙壁 如何

辣手須妨人 不堪

蘇丁龍世權畫年七十有九



龍世權 白梅綠鸚圖

蘇東坡詩 蘇東坡詩 蘇東坡詩 蘇東坡詩 蘇東坡詩

鹿野詩鈔

蔡如萃

先生字鹿野、鄉籍龍江。父偉光、字昭華、官歷湖南令。兄如蘅、字湘生、清嘉慶二十四年己卯、公元一八一九年進士、選庶吉士、授檢討、官歷侍從文學、著聲都門、尤篤於友愛。如萃乃少受乃兄薰陶、爲諸生、涉獵唐宋諸家、工於韻語、性喜遊矚、遂落落於林泉之下、閒閒乎歲月之中。事略見咸豐縣志、詩章見鄒崖逋者鈔讀之嶺南詩存、又見天津徐世昌編之晚晴移詩匯卷一百四十一。遺著有鹿野詩鈔。

舟中即事和黃琴山自高要郵寄韻

一片珠江月、涼波欲化煙。海如天不夜、人合酒爲年。香霧薈騰滋、燈光上下連。金錢能買醉、樽共倒花前。

和生洲細雨韻即寄伯元

西風吹短鬢、細雨作秋寒、未到窮途哭、焉知此事難。出塵看脫羽、愁濕滯歸翰。今夕聯床話、懷人更渺漫。

前題之二

重以無衣歎、將歸及歲寒。年華流水逝、心事上天難。玉宇何遼廓、空教鎖羽翰、無惊此相對、風葉夜漫漫。

白鸚鵡

一場春夢笑空虛、不去殷勤慰瑟居。珠串豔填樊素口、銀河秋望阿環書。霜欺星鬢冠初整、風曉晶簾羽不梳。莫妒練裙頻寫破、墨乾呼換玉蟾蜍。

聽桐山館詩集

蔡錦泉

先生字文淵、別字春帆、鄉籍龍江。清道光十二年壬辰、公元一八三二年登進士、授翰林

院編修、入直上書房、歷內閣中書、及遭母喪、南旋不復再出、主講端溪書院、士人多稱之、與朋輩交談、竟日無倦容、忽一日客甫去、即暴卒、身後寒素如作諸生時。生平能詩能畫、遺著有聽桐山館詩集。列傳見咸豐縣志、詩章見鄒崖逋者鈔讀之嶺南詩存。

村莊

爲要攀留過客車、小家卻拓大門閭。墟邊酒飯茶湯麵、門外牛羊犬豕驢。一片黃雲麩麥熟、三分綠水芰荷舒。廟中恰有村夫子、也遣兒童略讀書。

杜若居稿

蔡 蔭

先生字良若、鄉籍待考、清代諸生、築室西樵讀書、著有杜若居稿、卒年甫三十。見溫汝能纂輯之粵東詩海卷六十三。

有老蒼頭來問訊元孝消息

誰訪衡門裏、更闌語倍親。經年千里夢、多難舊家人。出卜憂生死、懷歸知苦辛。問余近音信、疏雨不堪論。

送曾二遷黃圃

吾鄉不久住、此去更何如。折我故園菊、隨君新卜居。別懷寒易入、世事老將疏。昨有還山夢、閒時不寄書。

十二芙蓉池館吟草

伍學藻

先生字用蘊、鄉籍勒流、清同治十二年癸酉貢生、歷任廣州學海堂學長、一時名士多出其門。卒年七十四。遺著有十二芙蓉池館吟草。事略見己巳版縣志、詩章見嶺南詩存。

和孟襄陽過龍泉寺精舍

龍泉有精舍、門掩蒼松深。朝來起愁疾、扶筇聊過尋。徑轉步迴廊、早聞鐘聲音。道人久不

見、握手豁清襟。坐我青豆房、爲我彈素琴。曲終念今昔、四顧還沈吟。遲遲夕陽下、言辭支道林。

苗風百詠

伍頌圻

先生字鏡穆、鄉籍勒流、清宣統邑庠生、廣州教忠學堂畢業、官歷廣西直隸州州判、貴州黔南縣縣長。公元一九三五年、重遊舊地、寫有苗風百詠一卷、紀黔南小數民族之苗族風俗風光。傳略見民國己巳縣志、詩章見南海余少飄編之廣東歷代詩鈔。

蔡家苗

《每敘親必吹笙跳舞謂之作夏婦人女子以氈爲髻飾以青布狀若牛角翁媳不相通言》  
蘆笙月下最銷魂、牛角裝成愛短禪、作夏場中尚歌舞、如何翁媳禁通言。

裸羅苗

《在大定聚族而居黔西分黑白二族黑者大姓其土司死以世襲之故子幼不能主其事時即以  
其妻爲女官稱曰耐德恒以銀絲花貼面上》

女官何事忽垂簾、貼到銀花恨更添、部落素頑新幼主、司晨雞牝不曾嫌。

白裸羅苗

《飲血無盂盤以三足鍋灼毛醋血無論蛇蛙俱燔而食之》

家家野食少盂盤、鼠雀蛙蛇付一燔、三足鐵鍋眞長物、血管取得過甕飧。

花苗

《夜無臥具寢處與豬牛同在一起嚴冬童稚裸體掘地焚柴炙身以取煖》  
一生寢處與豬牛、躡棘登峰捷似猴、掘地積薪焚以炙、問渠裸稚尚寒否。



折柳吟

周隱琴

先生鄉籍待考、按龍山陳緯南公手書遺稿之清詩拾萃所載稱爲司馬（清制爲郡官或知府）有詩二首如下。

送友之楚

荆楚艱難日、胡爲事遠遊、秋風吹別淚、送爾上孤舟。

送何惠祁再之粵西

君來春未來、春來君又去、春酒餞君行、春鶯啼處處。

周氏吟稿

周其芬

先生字桂山、鄉籍龍山蘇埠、清嘉慶癸酉、公元一八一三年舉人、官歷刑部員外郎、事略見咸豐縣志、詩章見溫肅輯錄之龍山詩錄。

藤鼓歌

君不龍川有鼓如龍鳴、百里隱隱轟雷霆。又不見陽山有鼓搥一曲、千百其聲斷復續。自秦而漢響相繼、嶺表之奇奇已足。豈知天地產神物、長虹爲形藤爲質。橫互江干能畫藏、夜半起作猿人筏。名臣挺劍膽氣豪、力掃群盜如燎毛。斷此巨藤作三鼓、一搥再搥聲怒號。總戎之衙都閩署、與端州堂置三處。遺留己歷四百年、奇物合有鬼神護。有時一擊聲逢逢、東西鳴應如雌雄。今於嶺嶠海氛息、聞聲猶憶前人功。吁嗟此藤未遇良工施斤斧、乃寄於層崖之交橫江之澗。一旦革面面革心、遂得安然坐堂廡。淵淵金石聾聵開、遠近傳遍如奔雷。異物之出本海甸、世間何地無奇材。

遊光孝寺過菩提舊址

勝地傳炎漢、千年佛國開。菩提何有樹、明鏡浪非臺。舊址誰爲繼、尋幽我獨來。參禪無德

士、塔畔自徘徊。

邊聲酬唱集

周兆璋

先生號雲瑒、鄉籍龍山蘇埠、清光緒丙子進士、官歷肅州同知有政聲、兼通醫學、歸粵後授徒城鄉、從游者數百人、門下因掇巍科登臚仕者不少。居鄉更輒爲人治病、濟世之心、一如在官之時。卒年七十、遺著有隴遊雜志、邊聲酬唱集、魚雁錄、醫門守約等、事略見民國己巳版縣志、詩章見溫肅輯錄之龍山詩錄下卷。

肅州道中作循萬里長城行至肅州城外屯營七十里出嘉峪關三日即玉門縣  
九折河流繞華嵩、蜿蜒山勢峪關中。輿圖已廓狼居遠、戍卒何須虎穴窮。西域屏藩資地險、北門鎖鑰鎮天雄。四夷自固中原守、漫侈秦皇漢武功。

吏治（各州縣廉俸俱薄故節禮應酬比他省從簡）

甘土人偏耐苦寒、宰官身亦帶儒酸。衙無蠹役親民易、令有廉聲作吏難。地瘠催科仍撫字、俗醇除弊即綏安。案無留牘吾何敢、所幸臺司考課寬。『第五句按原文鈔錄』

四月八日從左侯相城東二十鋪觀麥

天山北折水南流、麥浪連塍碧似油。千耦屯雲揮耒插、萬峰消雪引渠溝。野舍宿雨晨猶潤、田闢新畬歲倍收。最喜幕中戎政暇、籌邊兼課稻粱謀。

酒泉幕中秋夜旅懷

西風獵獵捲邊塵、秋色蒼然百感新。三十六城邊徼地、萬千餘里宦游身。笳聲飽聽家何在、驛使稀逢信莫詢。幸有故園今夜月、團圓長照玉關人。

六盤山遇雪

積雪彌漫沒馬蹄、行行難辨路東西。天寒地僻人蹤斷、脰膊遙聞野店雞。

佛緣詩存

周果

先生字佛緣、鄉籍大洲。清同治舉人、宗室官學教習。歷略見民國己巳縣志選舉表、詩章見鄒崖逋者鈔讀之嶺南詩存。

明宮詞

圖畫相看忽擲刀、痛思往事濕黃袍、君王但說饜饞惠、誰負真龍夜半逃。

又

御溝桐葉悄題紅、明月西園曲宴終、笑煞詩人太多事、隔花犬吠洩春風。

又

奪宮迎駕事匆匆、室主踉蹌出內宮、天子七年消受得、不應重索玉玲瓏。

魚雁錄述音

周廷幹

先生字孟年、鄉籍龍山、父兆璋、清光緒二年進士、政餘兼通歧黃、遺著有醫門守約、魚雁錄等傳世、廷幹繼家聲、登光緒二十九年癸卯與溫肅同榜進士、授翰林院檢討。事略見己巳續修縣志、詩見余少飄編之廣東歷代詩鈔及賴公廉肅之哲嗣際雲提示先人手澤。

爲賴廉肅鄉士繪鍾馗夜歸圖題

破傘孤燈兩腳泥、賣符南北與東西、只因今夜歸來晚、膽顫心驚怕鬼迷。

蔭普世兄屬題秋燈課子圖

歐陽畫荻柳丸熊、母訓從來具苦衷、十載寒窗勤課讀、秋宵相對一燈紅。

又

哀哀寡婦對孤兒、永夜劬勞只自知、游學歸來慈母慰、披圖猶憶授經時。

陳情吟

鄭際泰

先生字德道、號珠江、鄉籍林頭。少家貧、以力學舉清康熙乙卯鄉試、翌年丙辰、公元一六七六年登進士、授庶吉士、官至吏科給事中、先生學宗孔孟、事母至孝、自處儉約、常存利物濟人之心、晚近禪悅、喜與方外人遊、卒年七十有五。子叶梅、康熙癸巳舉人、爲明德之後。事略見咸豐癸丑縣志、詩一首見順德市博物館藏順德歷代士林書畫專集。

辭歸出都

一表陳情切、皇恩許賜歸。馬蹄馳嶺嶠、心曲戀彤闈。玉露凝衣冷、紅塵撲面稀。舉頭見烏鳥、箇箇繞枝飛。

冷澹齋稿

鄭天佐

先生字和璋、一字白渠、鄉籍待考、清代布衣。見番禺凌揚藻評輯之嶺南詩鈔卷十七。

帝子讀書臺

上世讀何書、高臺迥自如。己無人對席、只有月臨虛。岩壑含聲遠、鸞皇得意餘。綠雲深鎖處、余亦弗衣裾。

客齋春感

冷澹蕭齋易愴神、思鄉懷古最情真。出無奴監憐才客、歸有牛衣對泣人。暗淚入心花著露、愁容當面鏡生塵。南雲龍畔餘抔土、竟夕魂依白髮親。

自三水至韶州作

南津口對馬房岡、百頃蘆林夕照黃。今日牧牛來往路、己無人說靖南王。

前題之二

暗風吹雨晝陰陰、水氣西來正毒淫。不見伏波門弟子、行人空唱武溪深。

憶舊時稿

趙鳴玉

公字藹君、鄉籍碧江、清順治辛丑、公元一六六一年進士。官歷南漳縣知縣、事略見咸豐縣志、詩章見溫汝能纂輯之粵東詩海卷六十二。

送蔣曠生同年還姑蘇

暮年誰料見芝眉、同拜宮花憶舊時。一第喜君爲仕早、十年愧我去官遲。重攜濁酒增惆悵、獨上孤舟惜別離。此後相逢何處所、佇看青瑣在彤墀。

送李丹麓同年典粵試復命

河平相送半門徒、題柱先聲遍海隅。薊北久聞推哲匠、嶺南今復見真儒。千江春色隨仙舸、一路文光接帝都。慚愧曲江同宴客、扁舟垂釣在江湖。

自鳴軒吟草

趙鈞

先生字平垣、鄉籍碧江、清嘉慶十三年戊辰、公元一八零八年膺副貢。歷任羅定、饒平、豐順、揭陽教諭、學識才幹爲粵督阮元賞識、乃於創立學海堂時、延爲學長、爲世倚重。遺著有自鳴軒吟草。列傳見咸豐縣志、詩章見鄒崖逋者鈔讀之嶺南詩存。又見嶺海詩鈔。

珠江竹枝詞

海幢寶殿法幢高、不貢曇花貢露桃、心願未酬敬枕夜、鐘聲八百記偏牢。

又

雁翅城邊日影低、濠東搖得過濠西、十千沽酒拚同醉、惱殺迎潮夜半雞。

登泰山

茫茫碧落接清都、帝座分明近可呼。五氣鍊形推木德、三公視秩鞏皇圖。池能浴日非凡沼、松解凌霜亦大夫。造極莫將天下小、自來鄒魯盛鴻儒。

蓮社吟草

趙林臨

先生鄉籍碧江、清乾隆壬戌、公元一七四二年進士、官歷江蘇海州贛榆縣知縣。事略見咸豐縣志選舉表、詩章見溫汝能纂輯之粵東詩海補遺卷六。

寄呈林石門

贈別還圖畫、高懷孰與京。幾枝春日柳、無限故人情。白酒開蓮社、青襟滯客程。何時事歸計、花下濯塵纓。

過桐廬嚴子陵釣臺

萬山環繞水滌洄、謝絕浮名聳釣臺。肥遯肯教王土限、旁求終爲客星來。尺竿傲寄潛雖好、千古貧交局不開。畢竟鄴侯輸一著、及歸同榻幾低徊。

聽砧

月明人靜露華清、倏響遙村徹夜聲。腕力暫微虫復咽、可勝幽怨玉關情。

元翁吟草

趙元德

先生鄉籍碧江、清乾隆丁卯、公元一七四七年舉人、順天霸州文安縣知縣。見溫汝能纂輯之粵東詩海補遺卷六。

桃葉渡

渡江無楫莫躊躇、風定帆開一葦如。紅雨妾來迎二月、綠波君去寄雙魚。舟回定武方同夢、水隔秦淮又索居。怪得情深羅襪步、十三行把洛神書。

梅島弔史閣部可法

墓門風在柳花殘、建節當年國步艱。破碎山河方作鎮、敝疲軍旅始登壇。矢遺叛引貔貅集、敵至群驚劍戟寒。一自誓師沉玉後、金陵誰復說偏安。

湖聲吟稿

趙球

先生字襄侯、鄉籍待考、清代貢生。見溫汝能纂輯之粵東詩海卷六十三。

晚舟

客程歸已暝、織月上長空。人坐湖聲裏、舟行寒露中。衣光波冉冉、山影夜重重。何以酬茲夕、高吟與數公。

韡堂詩鈔

林萼

先生字應中、鄉籍待考、清代諸生、著有韡堂詩鈔、見番禺凌揚藻評輯之嶺海詩鈔卷十七

信天翁

不信人情只信天、得魚何必羨臨淵。守株以待原非拙、竭澤而漁亦可憐。靜對沙中儕鶴鶴、冷窺林外薄鷹鷂。樂飢大有風人趣、在藻依蒲意洒然。

劉伶

舉世沉冥盡醉夫、獨醒何忍一人孤。醇醪日爲韜光飲、未必先生是酒徒。

盧郎詩稿

盧棻

先生字尹京、一字杜蘅、鄉籍待考、清代布衣、詩存二章、見番禺凌揚藻評輯之嶺海詩鈔卷二十二。

寄贈女史李桂泉

題襟集內想姍姍、娘子軍容領一班。怪底詩心清似洗、門前綠水對青山。

前題之二

翩翩才調女相如、產自成都固匪虛。名士風流巾幗擅、鄭虔三絕畫詩書。

三郎吟稿

歐之麟

先生字振三、鄉籍待考、清康熙己卯、公元一六九九年舉人。見溫汝能纂輯之粵東詩海。

送黃致安之臺灣

消渴經年悵別頻、竹林難繫俠遊心。己多白髮謀生拙、不少青山欲住貧。病怯風波仍渡海、老無童僕遠依人。床頭錯料天涯事、孤負南園最好春。

介翁詩

歐家廉

先生字介持、鄉籍陳村、清光緒甲午。公元一八九四年恩科進士、官歷翰林院編修、湖南道監察御史。事略見民國己巳版縣志選舉表、詩一章見順德博物館藏順德歷代士林書畫專集所載。

贈仲酌仁兄

縱目天容曠、披襟海共開。山光隨皆到、雲影渡江來。世界漸雙足、生涯付一杯。橫風多景夢、一夢一鄉回。

筠園集

歐正式

先生字泰孚、鄉籍陳村、清順治年間膺歲貢、歷任新興縣訓導、著有筠園集傳世。事略見咸豐縣志選舉表、詩章見鄒崖逋者鈔讀之嶺南詩存。又見番禺凌揚藻評輯之嶺海詩鈔卷一

贈雁山

曾是依劉客子身、十年蹤跡粵江濱。夢懸湖海三秋月、目斷關河萬里塵。薛邑已辭彈鋏舍、聊城休作射書人。與君痛飲羅浮酒、醉看飛雲夜半輪。



山居

百年一萍梗、強半掩柴扉。多難逢人拙、安貧覺事稀。澗花憑檻發、海燕傍簷飛。便自足幽趣、何山不可依。

秋夜溪邊獨步

生計悠悠潭水清、殘秋夢起月中行。潮平江岸見魚戲、葉落山窗聞犬聲。徑竹半添湘女淚、路松何有大夫名。杜陵詩思泉明酒、林外何人稱隱情。

一鱗集

歐祖詒

先生字章世、鄉籍事略待考、著有一鱗集、見番禺凌揚藻評輯之嶺海詩鈔卷六。

集澄海縣署觀汪山人畫龍承方明府命賦

山人佼佼芝田鶴、解衣露臂肆盤礴。豪飲醉傾金叵羅、枯腸陡爾出芒角。琅玕一幅王版光、亂撒松煙高下落。須臾瀕洞雨洗空、地軸動生春電。一座驚聞霹靂響、海水倒立天河通。虬龍穿出青青爪、其意似欲無蒼穹。山人山人何神異、六法三祖等遊戲。天機清曠發精靈、不工畫形工畫意。今年二月三月春、龍慵下雨井揚塵。邑侯愛民如愛身、遍走群望祈酸辛。精誠七日通蒼曲、崩騰雨注河滿潏。爾時慵龍受訶斥、奮起縱橫吐瓊液。山人應是曾見來、故爾出手追魂魄。此圖之妙古所稀、留之兼作功德碑。

南山虎

虎踞南山麓、攫人作餼糧。只知飽肥脆、那計福與殃。呼風奮牙爪、弱肉當供強。遺齧腥草木、慘澹日昏黃。多殺干天和、上帝怒且傷。書詔敕長子、亟追勿逃亡。砰訇震厓石、黑雲馳電光。昔矜百獸王、今裂肝與腸。食殘獸尚爾、紀爲觀者商。

意園詩文集

歐功煥

先生字翹漢、一字劍村、鄉籍陳村。清乾隆丙子、公元一七五六年舉人、官歷澄海教諭、南雄府教授、著有意園詩文集。事略見咸豐縣志、詩章見番禺凌揚藻評輯之嶺海詩鈔卷九答友人問近況

蟠龍溪上水邊村、矮屋風開一角門。入世人嫌鐺有耳、寄身余欲石無言。愁城固負鑿鋒戰、詩債橫征取次論、幸不似貧惟一事、藥籠多貯共朝昏。

龍游道中

纏夫辛苦說龍游、纔過蘭溪便急流。風似奇文多逆勢、灘如高士不低頭。乾坤何意生吾輩、歲月無情老客舟。一束琴書三尺劍、勞勞輸與白沙鷗。

無逸堂稿

歐陽達

先生字慎思、鄉籍待考、清代歲貢、遺著有無逸堂稿。詩章見番禺凌揚藻評輯之嶺海詩鈔卷十。

花邊錢和胡同謙（當時人以外夷錢幣多有花形夷書而中無孔呼爲花邊錢）

點金無術笑迂儒、製出花邊鏹競儲。獻納漸通雙闕路、環迴兼識九夷書。形分日月光常近、望重威權孰可如。若使登朝逢敬叔、也應相訝寶盈車。

榕社吟稿

歐陽芬

先生字芸庾、鄉籍待考、清代諸生。見番禺凌揚藻評輯之嶺海詩鈔卷十五。

古榕（榕社在大沙村區劉二姓常相婚構比於朱陳）

鬚鬢老樹倚江濤、晚綠經冬色更深。二姓社邊連理種、六如亭畔惜香心。根浮土石珊瑚骨、子落莓苔點點金。最是木棉花外路、行人繫馬此披襟。

石樵詩草

嚴倫

先生字倫皆、號石樵、鄉籍大良、清乾隆時人、擅畫、喜仿米家山水、事略與詩見順德博物館藏順德歷代士林書畫專集。

自題雨後空山圖

雨後幽林生白煙、淺春斜柳草綿芊、妖嬈老女有餘態、漫懶歸途意惘然。

詩禪室稿

嚴顯

先生字時甫、鄉籍倫敦黎村、清嘉慶丙子、公元一八一六年舉人、曾任覺羅官學教習、有文名、工書善畫、書得四王神趣、畫擅山水蘭竹。事略與詩、見順德博物館藏順德歷代士林書畫專集。

書於詩禪室贈珍傑二兄時甲申歲杪

山清氣爽九秋天、黃菊紅萸滿泛船、千里結言寧有後、群賢畢至猥居前。

又

杜陵閒客今焉是、謝守風流古所傳、獨把秋英緣底事、老來情味向詩編。

又

七年烏帽枕黃塵、畫錦歸來世又新、若過武夷山下看、人間不太敵精神。

不窺園集

嚴大昌

先生字而大、鄉籍待考、清代諸生、雍正中年舉爲賢良、乾隆初年舉鴻博三院、詔給六品冠帶、著有不窺園集。見番禺凌揚藻評輯之嶺海詩鈔卷七。

謁思泉胡侯廟

少讀先生文、可繼震川後。長訪先生政、乃出獻臣右、立言與立功、至今傳不朽。沒世思德

音、英聲遠彌茂。心如水鏡懸、閃爍寒光透。長誇玉並潔、卻厭銅遺臭。撫字寓催科、輪將翻輻輳。吏呼不到門。民得樂耕耨。惠可甦涸鱗、威能驅猛獸。摘伏與擒奸、氛翳盡搜漱。化國日舒長、笑詠簾垂晝。百廢乃具興、偏補弊胥救。順動天地孚、斷行鬼神佑。但願天下肥、那惜一身瘦。瑤琴忽輟音、劬勞哀我后。衢殯罄金錢、巷哭競奔走。遺愛類桐鄉、堂開潔登豆。我來肅拜稽、清風猶可觀。鬚眉靜以閒、冠裳繪而繡。哲人後必達、游宦多華胄。就之詢遺徵、私淑如親授。

拙帖集

曾文英

先生字恬波、鄉籍待考、爵秩亦未詳、清乾隆乙酉年二月、(公元一七六五年)御駕南巡時、先生迎鑾獻詩、荷皇恩之賜、因得機緣、嘗執弟子之禮、以謁宮傅沈文愨公。遺著有拙帖集讀韻要訣。見番禺凌揚藻評輯之嶺海詩鈔卷十。

乙酉仲春二十五日恭進南巡詩

納賈陳詩次第看、詔求民瘼到江干。治河親閱龍門險、防海常教雁戶安。翠蓋花明籠瑞靄、龍旂柳染護輕寒。晴和二月剛逢閏、真覺堯階日月寬。

春江雜詠

廖上科

先生字界卿、一字高厓、鄉籍待考、以捕魚爲業、扁舟海涯、網罟中常隨好讀書、琅琅然與濤聲相應。三兩詞人載酒過訪、輒就其所得之魚、相與共飲、醉則彈琴賦詩以爲樂。見番禺凌揚藻評輯之嶺海詩鈔卷十四。

春江雜詠

廿年身寄水雲鄉、一葉春江樂倍長。險韻角詩吟競病、倦杯留劫打鴛鴦。素竿未必終垂雪、七首空勞共抱霜。今日太平風浪好、又攜樽酒去鳴榔。

先生字孺博、號蛻菴、鄉藉吉祐、生於一八七五年、卒於一九一五年。清光緒十九年癸巳公元一八九三年舉人、康南海有爲弟子、參與公車上書、名列保國會、戊戌後赴日本助梁啓超辦清議報。繼而與潘之博同入南京爲馮國璋幕、共謀倒袁、因憤袁稱帝、不幸暴卒。遺著有蛻菴詩詞集各一卷、事略與詩章、見毛谷風編之二十世紀名家詩詞鈔及余少飄編之廣東歷代詩鈔。

任公書來規慰至摯然區區之意似有未盡深知者賦此答之

鬱鬱孤懷不可寬、天回地動總無端。定知憂患是何物、坐閱飛沈剩古歡。半局敗棋驚劫急、九州放眼覺才難。著書合是窮愁事、敢怨空山薜荔寒。

又

吾曹所學期能信、風雨雞鳴更幾人。倘有龍泉知此意、豈愁牛斗不能神。六州鑄錯嗟何及、十擲成犍氣未馴。哀樂中年陶寫盡、只餘肝膽尚困輪。

秋夜

周遭蟲語裏、深望一燈殘。疲影赴遙夕、孱魂強暫安。折緜霜氣厲、走瓦葉聲乾。物候苦相逼、量腰帶漸寬。

庚子感事

噓噓三年陰翳日、密雲不雨自西郊。聖軍未決薔薇戰、黨禍驚聞瓜蔓抄。天動殺機龍戰野、春殘河閣鳳辭巢。美新文字傳人誦、卻有揚雄善解嘲。

又

壓城雲黑未全消、鬻策悲鳴多寂寥。天子並雄稱日山、匈奴自古倚天驕。微聞黃禍鋤非種、

且爲蒼生賦大招。棄卻珠崖罷西域、茂陵風雨夜蕭蕭。

秋感和任公

星河不動夜如年、獨夢孤嘖劇自憐。別後清輝隨月減、書來細字似蠶眠。宵宵殘蠟啼紅怨、嫋嫋涼蟾墮碧煙、入骨相思忘不得、雁行箏柱十三弦。

又

髡柳鬢鬢傍玉闌、羅衣惻惻不勝寒。驚霜鸚鵡知遙夜、裁被鴛鴦夢墜歡。未怨棄捐紈扇早、止愁消瘦帶圍寬。挑燈起織相思字、織就迴文獨自看。

又

露重衣單不自知、危闌倚立更移時。未應青鳥無消息、可奈斑駁怨別離。金燼叔寥尋斷夢、玉璫迢遞誤佳期。明朝擬涉秋江去、爲采芙蓉贈所思。

重九登龍華塔

人生能幾軒眉笑、聊試登臨破旅愁。如此江山如此客、一分憔悴一分秋。明年此會知何地、斜日西風更倚樓。且插茱萸休攬鏡、秋霜漸漸欲盈頭。

歲暮寄懷曼蓀二弟英倫

去年風雨聯床夜、高睨雄談各放顛。別後夢中見顏色、愁來夜起視山川。三人四弟公柱時各瘦知誰健、四海論才覺汝賢。同有看雲心事在、強持倦抱入新年。

二月二日雪中泛權西湖

經旬閉置同新婦、犯曉衝寒上畫橈。倦抱好山能自放、春寒禁柳不成條。蔚藍潑眼湖光淨、老木酣風雪意驕。欲去臨流還顧影、百年能幾此花朝。

賜書樓詩

胡亦常

先生字同謙、鄉籍多浦。父槐園、清雍正間進士、吏部員外郎、記名御史。亦常幼承家學十歲畢五經三傳、乾隆三十六年辛卯、公元一七七一年舉人、與欽州馮敏昌、同邑張錦芳稱嶺南三子。傳略見咸豐縣志、詩章見嶺南詩存。

漫成

信陵失魏齊、平原薄毛薛、二君媿知人、古今已稱絕。

定情曲

妾身是浮山、合與羅山住、風雨吹能來、風雨吹不去。

塞上

玄霜銷白骨、飛作塞沙黃、夜半冤魂聚、還疑說漢皇。

送曾生入京

帝里吾生長、南歸十五年。送君今夜夢、重得到幽燕。雨雪寒三月、河山路八千。白雲重回首、去住兩茫然。

送謝少文侍衛北上

地上看龍種、軍中號虎臣。行辭鈴閣靜、到及貝城春。子舍知長戀、天顏喜再親。將星依斗望、遙識近勾陳。

飛雲頂聽天雞

天地開鴻濛、天雞響碧空。一聲出雲際、萬籟生山中。滄海飛潮白、扶桑湧日紅。何人瞰暘谷、傾耳石樓東。

俠客

到處誦賢名、相逢尚未驚。氣雄翻短小、節折竟儒生。母死千車會、身存七國平。舊遊燕趙遍、還上大梁城。

太白樓

至今此樓上、天地落空青。自昔無同調、舉杯余復停。悠悠漢陽水、歷歷長庚星。明日拂衣去、長歌入渺冥。

孫典籍

亂定知真主、書成解阻兵。功疑拜陸賈、狂乃死彌衡。文字寧奇禍、君王尚聖明。如何鼙鼓後、始得見平生。

浴日亭

夜色赴高亭、烏輪躍渺冥。寒趨暘谷轉、潮湧海門青。元氣回群物、神功動百靈。寅賓識羲仲、翹首帝堯庭。

初晴

苦雨一旬中、淋漓瀉半空。芭蕉三十樹、吹折五更風。忽聽鳴鳩亂、旋驚曉日紅。故人或相訪、策杖過橋東。

寄譚用修

濯濯江上柳、落落澗底松。物情互欣悅、乃知春與冬。人生不困阨、安知英與雄。造物有厚薄、料匪群情同。衆庶殃其生、君子固其窮。高空見天骨、懷子臨長風。

風蘭

王香秀幽谷、衆草原難同。茲種更靈異、生氣迎寒風。孤根露鳥爪、碧敷春朝蔥。撮土絕附麗、蕝笠懸玲瓏。本地盡親下、怪此凌虛空。生非天地私、豈不隨飛蓬。葳蕤擢莖紫、攢簇



紛葩紅、物理悉可測、造化寧爲工。芝亦生無根、誰任滋培功。

蘇其詹析薪傷指示余詩大略感兒寬之貧抱子方之戚爰呈此作用達所屈束髮慕前賢、志異世人譏。常恐驟富貴、不復能貧賤。鄙事多所親、未敢耽清宴。蘇生管邴倫、操節苦靡倦。力任吳門春、硯守原憲狷。多誤緣未更、小懲寧非善。手足屢微傷、轉使增兢戰。志士終辛苦、詎溺意所便。

### 下甘竹灘

去灘尚十里、轟虺已動魄。石勢驟駭人、篙指聲策策。上下爭風雷、相去僅一隙。衆挽緣峻崖、兩手緊拔戟。嵯峨萬斛舟、漩渦俛輕擲。瞥然沒首尾、仰出百餘尺。人力失萬夫、但與神靈借。出險迴顏面、入夢驚未釋。古人屢垂堂、余曷狎行役。

### 晚眺懷甘正盤

石壁明夕暉。倒入江水平。滄灑播微波、瞥見孤帆征。浮雲不歸山、西去岡州城。下有賢隱人、長嘯鸞鳳聲。誰與彈素琴、相思空暮情。

### 飲酒

來者覆未發、往者跡已判。迭如寒暑更、豈必我所願。仰焉思古人、此理久永歎。顏憲亦人情、貧夭豈足玩。命與利罕言、聖亦知汗漫。通識赴所懷、諒匪天人勸。

### 疑塚

七十疑墳總莫憑、漳南漳北暮煙凝、可憐麥飯逢寒食、只有人知上惠陵。

### 又

智絕姦雄豈庇身、千年玉匣出江濱、分明遺令西陵望、併誤銅臺歌舞人。

### 硯

割自羚羊紫玉堆、昭王臺返粵王臺、兒時記得頻呵凍、曾侍先臣草諫來。

寧江竹枝詞

夜郎江水走羚羊、萬斛舟行激箭忙、今日遠遊郎且住、風波愁殺仰船岡。地在順德新會交界寧江即東西馬寧鄉

草書行贈潘景最

十五學草書、不肯隨等輩。把筆初祖梁與馮、二生健筆千人廢。向余往往稱潘君、閒來山房分清塵。潘君靜者好奇古、神髓漸與古人親。敗筆數斗墨數斛、書法留筋不留肉。興至含毫久經營、意已飛動無羈束。破打銀瓶墨汁飛、黃河倒注水九曲。紙盡擲筆意有餘、顧盼欲揮千萬幅。此時山房老樹排青冥、冥中拏攫秋風爭。鶴鶴如鬼咳且嘯、怪狀似助人縱橫。坐中之客群歎息、主人起言腕下神助非人力。風雨颯沓來、天地無顏色。唐懷素後草法亡、此意至今少所識。當今海內推能書、自恨不及劉石夫。生平強項見之屈、流宕崛強今時無。我愛主人筆有神、又聞此言張吾軍。省悟讀書與養氣、氣盛筆妙殊絕倫。君不見白沙先生儒者宗、圭山之茅化爲龍。

王以寧畫龍歌

王生淋漓潑墨誰人同。拳塗爪抹渾天工。空壁突兀來真龍。之而滅沒有無中。白氣上下旋成空、海水倒立滄溟東。手掣匹練目眩久、天漏驟恐靈精通。神來之技技止此、玄道僧繇今未死。咫尺雷雨龍宮來、玉軸愁波平津水。嗚呼乖龍割耳天神誅。遇災不同向天呼。坐使七年湯旱桑林雩。安得汝手鬼神俱。九州五嶽留真圖。出匣雲氣須臾鋪。跳梁魃鬼啼嗚嗚。

踏車曲

歷歷碌碌、水入車腹。不往則復。海遠於岸、中間轉灌、水上天半、一半人汗。長腰環環、足繭車翻。暮滿朝乾。龜坼呀開、草死飛灰大吏回、催租誰縣吏來。

梅雪堂詩草

胡國柱

先生字元子、鄉籍待考、清代太學生、著有梅雪堂詩草、見溫汝能纂輯之粵東詩海卷六二  
擬讀曲歌

圍坐讌諸姬、倩歡爲酒政、歡莫生陷阱。  
乘醉學投壺、歡方中壺耳、儂亦躍三矢。

浮家吟稿

胡天寵

先生字衢陟、鄉籍待考、清順治辛卯、公元一六五一年舉人。詩章見溫汝能纂輯之粵東詩  
海卷五十七。

水宿

水宿靜分照、浮家亦卜鄰。山昏多不辨、風急奈何嗔。破夢聽魚鱉、含情覺笑嚬。江湖殘月  
隱、螢火故相親。

拙圃詩草

胡光前

先生字開先、鄉籍待考、清乾隆戊午、公元一七三八年舉人。著有拙圃詩草、見溫汝能纂  
輯之粵東詩海卷八十一。

高平對月

霜冷更初寂、微雲天一隅。不知今夜月、照得故園無。

子夜歌

種柳柳依依、栽花花又飛。郎去春隨去、春歸郎不歸。

涉灘

今昔同歌行路難、涉河三百六重灘、一灘一陡牽心裏、盡日灘聲盡日寒。

古草詩鈔

胡其砥

先生字子山、鄉籍待考、清代諸生、著有古草詩鈔。見溫汝能纂輯之粵東詩海卷九十四。容園英石山得自倫溪梁氏變歷滄桑中遷幾地而玲瓏峻削巋然無虧適嘉應李道登至喜其秀拔嗣響石湖作詩以贈主人囑余和製

春花撩眼明棐几、蘚繡疏垣已綉纒。雨生欲潤雲腳生、呼噏玲瓏峰碧峙。容園何處得此石、神人鞭來亦偶耳。鋒稜峯岬出尋丈、一氣銳上光清泚。當其眠真若老樹、槎枒腹裂穿蛭螻。皸皸透竅蠹當軒、大英小英幾莫恃。歎息此石從來久、松石山房舊世守。宗伯解官稱好事、欲求不能買無有。桑田滄海難復常、寸圃愁吟石湖叟。擬賦金人淚如水、轉移今又無脛走。風敲雨颭聲硠硠、嵌空鬥竦煙蒼蒼。山靈鬼斧何年劈、或借燧火爲剝傷。海岳頑魄必下拜、歐公菱石對客觴。豈有巉巖挺瑩碧、漠視不爲驚如狂。搖毫誰作識奇特、彈壓百怪來鴻章。道登李子詩最敏、勸我學步剗肝腸。松石君雲淙老、嶙峋兩意良絕倒。換馬蛾眉仍不可。何如容園不用一錢買、別開一室生煙島。幽石疏軒種芝草、對客清風見懷抱。

春日再訪青蘿

十年識面愛來遊、半畝繁榕俯碧流。乳燕帶花飛入戶、好山和月照當樓。奇章宅裏蹲槎石、魯望江邊隱釣舟。且喜夜樽消硯壘、不須談劍說并州。

過簡夫舊宅

零落頽垣二月陰、鳥啼何處喚人琴。應多燕市屠沽感、爲愴山陽向秀心。亭子讌歌春夢短、竹林衣葛暮年禁。南濱一曲隨漁父、月入蘆花幾許深。

讀劍南集

鏡湖博士領蓮花、月給千壺願作家。記取杏花春雨句、軟塵騎馬客京華。

蒼崖詩稿

胡廷鈞

先生字子濬、鄉籍待考、清嘉慶甲子、公元一八零四年副貢、著有蒼崖詩稿。見溫汝能纂輯之粵東詩海卷九十五。

滴水巖

高崖摩蒼天、爛若鬼斧鑿。積鐵達岩底、至下轉寬廓。岩頭看跳珠、鳴濺類搏躍。滴瀝雨腳垂、下注成溪壑。石磴連羊腸、險澀步履惡。攀躋及其巔、石勢平如削。非我有仙骨、乃欲凌飛鶴。招邀古安期、爲我回清酌。

曹娥墳

上虞傳孝女、千載有曹娥。碑版留黃絹、江聲起白波。愁雲精衛立、寒雨杜鵑多。淒絕墳邊道、依依長蓼莪。

一坡遺草

胡思

先生字瞻憲、鄉籍待考、清代布衣。著有一坡遺草。見溫汝能纂輯之粵東詩海卷九十五。

秋夜與叔子濬諫卿優晏話舊

木葉有微霜、寒燈夜正長。孤懷頻倚劍、萬事一浮觴。器識君何似、風波子所嘗。幽期行自愛、莫待菊花黃。

客夜寄懷故園諸子

獨酌難成醉、長醒易感秋。山中叢桂伴、夢裏大刀頭。世事笑蠻觸、鄉心悵女牛。少年多意氣、燒燭看吳鉤。

秋江詞

烏逢白板老農扉、夾岸漁舟入望微。潮落水田人刈稻、細鶯新雁一時飛。

眠琴館詩鈔

胡斯鐔

先生字鈞奏、一字和軒。鄉籍待考、清代貢生、官歷常州府通判。常與武進士趙味辛、龔聲甫、丁若士交善。著有眠琴館詩鈔。見番禺凌揚藻評輯之嶺海詩鈔卷二十二。

丹徒舟次寄趙味辛

滿載南朝恨、來聽北固鐘。江寒秋葉落、山遠暮雲封。憶別花三月、相思路幾重。何時同秉燭、樽酒話離蹤。

登燕子磯絕頂

危磯直上勢峻嶒、萬頃蒼茫試一登。江水西來通蜀國；吳山南盡即金陵。六朝宮闕成狐穴、百戰山河剩佛燈。往事悠悠易生感、海門無際暮煙凝。

小雲吟章

胡雲姬

女史鄉籍待考、清代才女子、明經胡大林之妹、見溫汝能纂輯之粵東詩海卷九十七。

秋杪送仲兄之博羅

臨岐兄妹話多愁、海闊揚帆不可留。心逐潮痕窮島嶼、興隨詩夢到羅浮。霜飛天外風飄雁、菊老籬邊柳送秋。惟有高堂長愛日、臘前應早命歸舟。

水亭即事

胡青娥

女史鄉籍待考、事略亦待詳、清代才女子、見溫汝能纂輯之粵東詩海卷九十七。

秋夜水亭即事

小亭翻映浸空明、半捲湘簾夜氣清。倚檻厭聞江岸笛、催詩喜聽驛樓更。星浮水鏡魚沉影、樹老秋風葉有聲。此際可無添爽快、閨中如坐玉壺冰。

色香俱古之室詩鈔

賴瀛

先生字榴海、鄉藉龍山仙塘、父賴經、家素豐、授以讀、少即力學工文、遭父喪、哀毀骨立、遂輟科名之途、以世行善、凶年常捐穀平糶、貧而無力還其貸者、悉焚其券、鄉里稱賢。著有色香俱古之室詩鈔。事略見民國己巳版縣志、詩章見溫肅輯錄之龍山詩錄卷下。

虎門行

大虎二虎夾一水、中矗炮台如鼎峙。上流東咽省會開、下流守險敵魄褻。辛丑二月初七日、紅夷逞強隳網紀。火輪戰艦百十艘、乘潮利趁風帆駛。突然直指虎門前、守兵奔散竄如鼠。臺後伏兵誰所撤、失計亡唇寒到齒。將軍關姓素智勇、一軍扼險三角裏。日戰數十砲連天。十萬紅夷盡披靡。再攻再厲傾巢來、請救不虞吳太宰。硫黃重用炮忽炸、將軍雖死如不死。父死忠兮子死孝、恰同卞壺垂青史。雖然夷船勢破竹、尚有天生橫當阻。豈知全軍早撤衛、致令重險頓失禦。長驅直入薄烏涌、講和誤國伊誰是。吁嗟乎、關將軍功勳幾與睢陽比。不作貪生輩、寧爲忠義鬼。於今忠義成風俗、藉振人心知所恥。

登鎮海樓

縱目層樓外、摠懷古蹟中。一隅生割據、百尺範英雄。西北青冥接、東南積水通。版圖歸禹甸、休問大王風。

且樸軒詩鈔

賴孟瑜

先生字佩忠、賴瀛子、清咸豐辛亥、公元一八五一年舉人、著有且樸軒詩鈔。事略見民國己巳版縣志、詩章見溫肅輯錄之龍山詩錄卷下。

春日偕伍石琴同年泛舟訪溫藻裳農部

御李舟同泛、春江一葉扁。橋通疑樹隔、水轉愛沙圓。便作神仙想、言尋香火緣。談深歸傍

晚、漁舍遍吹煙。

達馨吟草

賴孝通

先生字達馨、乃賴瀛之孫、孟瑜之子。清光緒丙子、公元一八七六年舉人。事略見民國己巳版縣志、詩章見南海余少飄編之廣東歷代詩鈔卷五。

西樵山杜鵑

紫姑仙去剩丹砂、化作千峰萬壑花。春夜似啼雲棧月、洞天深擁赤城霞。踏青游侶爭尋豔、拾翠佳人唱採茶。恍惚聲聲喚歸去、雲泉好住不思家。

虛舟詩草

賴學海

先生字虛舟、鄉籍龍山仙塘、清代布衣。著有虛舟詩草。事略與詩、見公元一九三五年乙亥溫肅輯錄之龍山詩錄卷下。

珠江曲

春態融融淥波暖、嬌歌遠答雛鶯囀。銀燈欲墜曉光微、春晝何長春夜短、玉釵花冶生紅煙、水窗斜月窺綺筵。月到珠江亦有情、波心遙漾遲歌聲。（春）

花埭花雲似不流、素馨簇簇團香毬。五色翩仙化蛺蝶、夜深飛上佳人頭。荔枝灣裏紅雲宴、四面無風香軟扇。不分月魄與花魂、盈盈碧玉釵頭顫。（夏）

桂船蘭棹交徘徊、無船不向珠江開。方從月下尋花去、又見花船載月來。七尺龍鬚涼不熱、妙舞嬌歌齊按節。海珠如月月如珠、盈手贈君勸君掇。（秋）

水閣繡簾凝不動、金雀鬢低玉釵重。入懷膚暖粉光融、酒客和煙作春夢。燈炎萬點照嫦娥、蕩波不作琉璃凍。席上藏鉤人未眠、船頭明月飛上天。（冬）



先生字伯以、號介民、鄉籍龍山排涌、著有垂綸閣集。事略與詩見溫肅輯錄之龍山詩錄。

重遊西樵

舊時名勝近如何、廿載重來問薜蘿。白髮已嗟吾欲老、青山還許客重過。林花不爲三秋減、雲水依然萬壑多。何日閒身於此寄、茅檐竹笠老岩阿。

秋日別燕和溫冀緒友兄

上林曾鬧幾時春、秋日翻辭舊主人。幾畏露寒濡羽翼、卻憐月好憶江濱。歸飛頡頏愁中影、惜別呢喃夢裏身。不久陽和復相見、梁前巢壘未生塵。

精華錄詩

梅本裕

先生字蒼枝、鄉籍龍山排涌、清代太學生、著有精華錄、詩章見溫肅輯錄之龍山詩錄。

中山欖溪看菊宿桂園與蒙其伯岑叔元話舊

又得連床臥、秋齋夜未闌。事驚同逝水、書憶勸加餐。茹菊知心苦、行歌識路難。離鸞與別鵠、莫漫入琴彈。

紅梅驛題壁。

依舊墻垣接斷崖、停車何事亦傷懷。深山裹足真無術、岐路相逢未有涯。去馬塵隨雲影沒、落花香付燕泥埋。臺侯故宅憑誰問、只自題詩送夕佳。

梅幹翁詩

梅修

先生字幹修、鄉籍龍山、清代諸生。事略與詩、見乙亥溫肅輯錄之龍山詩錄卷上。

讀陳獨漉集

南國詞壇剩瓣香、詩人原自有清商。小弁興怨兼君父、大雅遺音並屈梁。老去才華方問世、

亂來心事倍思鄉。今逢四海爲家日、會向名山啓舊藏。

謁張忠諫祠

曾拼熱血濺乾坤、祠廟千秋俎豆尊。臣節已完身盡廢、君恩猶戀志徒存。死投諫草悲無地、生愛梅花樂有村。遺範前朝人共仰、登堂余欲薦蘋蘩。

過吳貞女墓

寥寂行吟落照時、峰迴金紫弔芳姿。豈知青史奇男子、猶有紅閨烈女兒。殘碣尚餘前代跡、長橋遍起後人思。甘泉舊日遺文在、擬比曹娥絕妙詞。

初秋登金峰玩月步張友人韻

坐遍高峰一夕幽。一涵冰鏡早澄秋。空明洞入三千界、海色光分十二樓。梧葉乍凋金井冷、砧聲私遞玉關愁。再來擬約平臨夜、與子同攀最上頭。

過李抱真子長先生墓

平生寄傲在林泉、魂魄猶依里社前。自昔長官名不得、迄今孺子口能傳。展禽墓側無樵斧、若水碑陰有杜鵑。七十二峰誰是主、如君寧費買山錢。『按先生之墓在南海西樵山』

艾納香齋詩稿

梅璿樞

先生字環中、鄉籍龍山小陳涌、清代諸生。著有艾納香齋詩稿、見溫肅輯錄龍山詩錄下卷書邑令陳志儀梅氏學田記後

吾祖名垂粵、貞珉鳳嶺前。雄文徵邑乘、勵學表書田。樾蔭絃歌洽、香風甲第綿。焚膏須焯掌、庶不負承先。

龍山竹枝詞十二首

金竹山頭草木妍、石欄古井漾清漣。憑誰好事攜春茗、品作人間第一泉。

春雨濛濛底事忙、秧針綠滿種魚塘、夜間照蛤松明火、影出村心特地光。  
清晨菜把出園岡、露甲煙芽溢擔旁、淡薄刻憐風味好、他年休負菜根香。  
苧帷竹箔架中央、杉屋明燈是煖房、蠶造今年絲價好、棗糕頻祭馬頭娘。  
金雞坑上金雞多、石螺岡前採石螺、生長鰲魚山腳下、空聞兩度噴晴波。  
老樹槎枿大道邊、舊時佐讀說狐仙、梅花莊廢忠魂在、翹首風流四百年。  
漱玉泉中春水清、漱玉泉邊秋月明、遊人汲水看新月、誰識清光非世情。  
郎歸慣見醉顏酡、怪道年年酒債多、乘便甘灘賣柴去、鱒魚肥瘦近如何。  
通廬關近白蓮臺、百貨齊攤十笏開、傍晚雲關絲客過、等閒知趁大墟來。  
伏獅垂頷水源通、夾岸人煙綠樹中、好是晝長喧午夢、亂蟬聲裏荔枝紅。  
北風遙計海船還、玉蝶花開妒玉顏、庭上不栽紅豆樹、家鄰大小鳳凰山。  
青山疊疊水粼粼、紫閣風光四面新、聞道重陽遊榼盛、不知落帽更何人。

觀棲壑禪師影堂遺履

衆峰環裏選佛場、曹溪一滴流清香。蓮花洞主發宏願、百弓金界施空王。  
棲壑應世開法席、慶雲紀縵騰精芒。浮葩浪蕊總掃卻、宗律嚴振菩提坊。遺碑首戒立尺土、  
伊蒲盡仰天人糧。三十五寺劫灰冷、巋然獨此標靈光。龍象蹴蹋法力大、  
松蘿藻井增輝煌。竭來祇園懷古德、歷階肅謁開山堂。珠眉蓮眼放真彩、  
本來面目何曾藏。藩嗣當年暗齟齬、玄沙鉢定驚披猖。可知慈威不在猛、  
雄聲雌步空講張。乳僧捧篋示遺履、愕怪巨武超尋常。神鷹掠珠斂倦翮、  
行跡凜凜餘風霜。化人閱世空所有、南華寶鉢歸蒼茫。似貽徒衆慎繩檢、  
法物一片留雲房。我持德瓶誣夙慧、發性那用醍醐嘗。人生知著幾兩屐、  
每逢佳處須翱翔。妄圖作佛亦不易、火坑拔足迴清涼。留將隻履西歸意、  
認取龍山柯四郎。『見本詩選明代天聲之部』

自娛集

梅玉照

先生字寶田、鄉籍龍山大陳涌、清代諸生。著有自娛集、事略與詩一首、見溫肅輯錄之龍山詩錄下卷。

慶遠道中

草墟歷歷接山城、迤邐蠶叢不記程、度日如年情冷暖、自春徂夏景紛更。途窮欲發西州慟、舌在權爲蜀道行。落魄天涯歸未得、路難頻聽鷓鴣聲。

草間蛩響

梅之品

先生字可人、又號袖手老人、乃玉照之弟、清代布衣。著有草間蛩響。見一九三五年乙亥溫肅輯錄之龍山詩錄下卷。

短歌行

有詩多工愁、有心多懷憂、世事勿復問、空教人白頭。

鸞屋

歸燕揀高粱、棲鳥借全樹。禽鳥尚戀巢、吾家在何處。第宅舊臨江、亦足蔽風露。日月幾何時、回首不堪顧。哀哀皇考仁、經營煩百慮。一日棄如遺、成敗或定數。不孝夫何辭、兩兄亦窘步。顛躓二十年、此錯真難鑄。逋債竟等身、倒行爲日暮。積金遺子孫、此計原非誤。廉吏不可爲、語中有真趣。(先君子曾任官乳源)廣廈不可造、大裘空懷抱。茅屋破秋風、流離憐杜老。詞客古如斯、搔首問蒼昊。詩書似誤人、服賈悔不早。地癖固爲佳、錢愚亦良好。羞惡本分明、因貧遂顛倒。守成業已非、繼志心如擣。掩面淚流襟、無顏見皇考。上念我萱堂、興亡一身當。有兒反若此、不如棄路旁。欲采長生樂、神州知何方。倘能延壽考、或免長悽惶。啼飢與號寒、妻子安足傷。惟有生我人、於心終不忘。乞米留簡札、乞食恨無

章。顏公與陶公”艱苦曾備嘗。況余有母遺、命也何不良。相憐有同病、聞雁應斷腸。

### 劬書軒詩鈔

梅夢雄

先生字禧疇、號閣樓、鄉籍龍山小陳涌、乃璿樞之子、清道光丙午、一八四六年解元。著有劬書軒詩鈔。事略與詩、見一九三五年乙亥溫肅輯錄之龍山詩錄卷下。

#### 道光丙午科領解感賦

豈徒冷艷冠群芳、回首槐花幾度忙。塗抹未須隨少艾、功名先已悟黃梁。謾論臺閣矜文體、別有篇章貶錦囊。歲晏華余聊自證、晚成堂外六瑩堂。

#### 攬芳園丹桂歌

聞道桂林無雜樹、挺生遙稟星精注。岱輿丹桂百尋高、花史流傳空賞慕。蟾窟香飄羨廣寒、罡風吹子落雲端。仙根但傍瓊樓結。靈種那容紫陌看。渥丹綻蕊馨繁縟、引到綵鵬增麗矚。萬斛香塵換玉犀、九秋頻赭霏金粟。芳心原不涉塵埃、誰向平泉飽看來。豈是白榆天上種。正如紅杏日邊栽。小山招隱林都密、讓此薜蘿遙秀出。有客吟詩憶許棠、何人倚樹思吳質。我昔尋芳到柳塘、兩株濃淡蘸波光。每至秋風花爛漫、膽瓶曾得插天香。世事滄桑疑海蜃、邇來無復論花信。劉郎回首拂紅塵、憔悴榮華皆轉瞬。吾鄉新闢攬芳園、異種移來品獨尊。秋氣蒸成寒馥赤、一時香豔冠花村。勾漏丹砂新鍊足、梢頭點點繁英續。我似東坡見海棠。翻疑銜子來鴻鵠。亭臺如到大羅天、况復門臨漱玉泉。逸興合如桐樹洗、歡悰方似月華圓。靈根佳士如相待、忠諫梅花經幾載。玉骨冰肌跡已空、只今猶覺風流在。年年露冷月明時、可許幽人折一枝。托根得所花應笑、我欲憑闌一問之。

蒿園詩集

譚湘

先生字澄秋、鄉籍待考、清代布衣、世謂其蒿園詩集、豪壯清麗、滔滔如松風洒落於千岩萬壑之間、讀之可撲去面塵三斗云。見溫汝能纂輯之粵東詩海卷七十九。

待雁

獨立重翹首、天高風更哀。葉從今日落、書已昨宵裁。南北幾時到、關山萬里開。蘇卿倍惆悵、頭白未歸來。

讀項羽本紀

成敗英雄定論難、劍光燈影一邊寒。江山有命歸真主、文字何心罪史官。計失自貽酬璧日、夜行翻怪沐猴冠。深憐逐鹿徒稱霸、垓下悲歌夕照殘。

彭城人去霸圖空、汗血徒勞百戰功。三尺定誰分漢楚、八千憐爾負英雄。關中夕照連秋草、垓下悲歌起暮風。豪氣自知能蓋世、不堪回首問江東。

子陵臺

雲移碧樹走灘聲、臺峙中流獨釣名。五夜星辰疑太史、一竿煙水老先生。蘆花兩岸浮孤月、錦繡高峰逼太清。漢代只今成底事、滔滔千載故人情。

百花墳

風流豔骨可人憐、朝化香魂暮化煙。十載一生春夢曉、百花三月奈愁天。杜鵑有恨寧啼血、蛺蝶多情未了緣。莫怨夜臺儔侶寡、粵城西望素馨田。

暮春雅集議修社事

南園風雅久凋零、落落朋儕散曉星。戶閉十年春夢破、鶯傳三月柳條青。韶光似客看流水、山色宜人列翠屏。今古不殊文酒地、坐花吟醉擬蘭亭。

攬芳園詩鈔

譚楷

公字幹年、鄉籍龍山沙富、清道光丁酉、公元一八三七年副貢、著有攬芳園詩鈔傳世、事略與詩、見公元一九三五年乙亥溫肅輯錄之龍山詩錄下卷。

過龍橋福和寺

廢寺倚疏林、斷續殘山接。野鶴作饑聲、枯榕垂老鬣。下有養魚塘、水可褰裳涉。芥藍爭水光、葉瘦花重疊。行行不見人、閒煞黃蝴蝶。

曉起

殘月仍未收、旭日已東起。晨雞漸歇聲、餘霞初散綺。仰視天色青、萬里無渣滓。掃案拂書塵、養花換瓶水。鑪烹雀舌茶、粥啜桃花米。此夕心孔清、湛然如水止。曙光尚熹微、塵事未紛舉。我生歷世途、閒暇無多子。茲晨涉清景、信是天所與。叩門且勿應、門外有城市。

曠懷

魯酒不多酌、吳鉤亦懶看。曠懷生死外、隨處海天寬。雲淨有明月、空潭無濁瀾。僧齋此兩日、勝服小還丹。

霞菴詩稿

譚溢元

先生字冲然、一字飛霞、鄉籍待考。清代布衣、事略不詳、詩一章見番禺凌揚藻評輯之嶺海詩鈔卷十八。

寄黃伯藉

小春風物自相偃、嘉會何由得再來。屠狗客尋燕市俠、鬥雞人重建安才。勞生況味長亭柳、遠道情懷驛使梅。芳酒一樽聊獨酌、斷鴻高望鳳城隈。

左氏吟草

左金泉

先生字眷求、鄉籍待考、清代諸生。見溫汝能纂輯之粵東詩海卷九十五。

樵南即目

野樹連春陌、飛鳧下綠洲。平江春水漫、歷亂泛輕舟。

前題之二

溪繞夕陽山、行人度幽樹、漁翁刺釣舟、驚起孤飛鷺。

前題之三

古樹行人歇、空山野雀喧、斷雲含晝雨、風送入前村。

前題之四

煙起江村晚、牛羊斷續歸、暮雲斂天末、月出一鉤微。

省軒詩稿

左業先

先生字省軒、鄉籍龍山沙洲、清代太學生。事略與詩見乙亥溫肅輯錄之龍山詩錄上卷。

次和汪鹿岡大沙塘寓齋

見說弓刀不繫腰、雄心時有酒相撩。新辭故里尋幽僻、同在他鄉慰寂寥。躍水銀魚知月冷、墮籬黃葉報霜消。米家圖畫無粧點、一幅林塘帶雨描。

平生愁與杜陵如、一卷詩鈔手校餘。閒補破籬圍鬥鳥、偶拈殘飯飼游魚。依人不見虬髯俠。寄跡終嫌蝶夢虛。花事尋常妨蠟屐、湘簾低著半床書。



寄亭草

潘鳳昌

先生字允韶、鄉籍沖鶴、清代諸生。著有寄亭草、見溫汝能纂輯之粵東詩海卷七十四。

睡燕

穩學鴛鴦宿、何須玳瑁梁。物情無所著、人事爲誰忙。社罷花三月、巢成水一塘、此中堪妒殺、休更夢昭陽。

九畹堂詩集

潘蘭皋

先生字澧翹、號九畹、鄉籍古樓、清乾隆壬午、公元一七六二年舉人。官歷江西萬年縣知縣、著有九畹堂詩集。事略見咸豐縣志、詩章見溫汝能纂輯之粵東詩海卷八十四。

羊城歸舟夜泊石壁

壁立千峰峭、雲開四望空。漁歌山色外、客夢水聲中。沙白江如練、林疏葉落風。孤舟夜寥寂、一鶴自橫東。

行路難

路滑滑、雪漫漫。衝寒冒險行路難。腳夫忍凍腳無力、十步九跌行不得。行不得、且將擇地權棲宿。自古忙中多錯足。

夾馬營

焚香夜祝豈無人、應運興王自有真。五代干戈天厭亂、兩京文物地爭新。國危易戴匡時主、兵變難終北面臣。大志早知惟阿母、黃袍多事苦加身。

北行道中寄懷盧大立亭

肺腑何人細共傾、孤帆迢遞赴神京。八千里路分南北、六十年來老弟兄。知我自憐惟鮑子。愛才誰復識虞卿。等閒歸臥東山下、同聽聯床夜雨聲。

潘氏題畫詩

潘元貞

先生字小屏、鄉籍待考、按乃清代同光時人、善畫花卉、尤善沒骨法寫牡丹、有清新秀麗之氣。事略與詩、見順德市博物館藏順德歷代士林書畫專集。

自題富貴春暖圖

粉香雲煖露華新、曉日清熏富貴春、好似沈香亭上看、東方依約可憐人。

菱湖邊屋詩

馬貞榆

先生字季立、鄉籍桂洲、清光緒三十三年、公元一九零七年廩生、任禮學館顧問官、事略見民國己巳版縣志、詩章見福建侯官陳衍編之現代詩鈔卷十四。

寄石遺並序

余在武昌十餘年、只剩得菱湖邊一屋、此地背山面湖、夏日荷花彌望、恍住舟中、晚見隔湖燈火、不知其在城市也。去秋武昌兵起、家人避走漢上、余客京師、意此屋必不保矣。石遺知余最深、歲暮有詩見懷云：太師書生待汝來、窮途垂老客金臺、屋廬書籍辛勤有、莫使昆明付劫灰。蓋石遺知余館穀銳減、薦爲大學堂教習、故獨遊京師也。今春返鄂、則見屋舍依然、失喜卻賦。

牽蘿補屋十年餘、長物全無只破書。烽火已消松鶴在、依然綠蔭舊時居。

答石遺索錄舊作

識君忽忽踰十年、臧否約略同媿妍。相知豈在文字末、刻鏤肺肝通天淵。君才濟世不大用、有如天馬遭牽纏。溢爲歌詩發奇氣、精偉卓絕百千篇。況復好事及朋友、搜詩佳什付雕鐫。我生固蔽兼躁急、君爲開正藥其偏。又推臭味引同調、自顧下里慚喧傳。邇來世事浮雲改、念我衰朽難安全。此意不言我默感、臨風北望徒拳拳。

晦巖詩稿

馮兆光

先生字輝宇、鄉籍龍山旺村、清代諸生、著有晦巖詩稿。事略詩章見溫肅輯錄之龍山詩錄

題楊妃調鸚鵡圖

大劫終難懺、人然鳥亦然。獨憐人覺後、翻讓鳥知先。禮佛本多事、啣恩空有緣。應嗟苑中塚、不近馬嵬邊。

題蘇武牧羝圖

黃雲橫天捲沙漠、朔邊健兒夜吹角。有人荷箠坐衰草、雪片如拳劈頭落。寒風慘淡日月頽、胡塵鎖眉撥不開。枯顏白髮愁無語、鬚郎（羊一名胡鬚郎）十百俱增哀。憶自脅降若相逼、燼火坎中贖餘息。虞常血濺漢臣衣、南望彤廷淚頻拭。窖中幽閉腹枵餒、雪咽肝腸冷鐵石。身膏草野何足論、銷磨勁節終盤根。人生朝露縱易萎、要使大義干層雲。不然擁衆賜王號、異域螻蟻空孤恩。乃知困厄旄落盡、熱血朝暮漂羈魂。拚卻肝腦啖胡犬、還捧赤心歸至尊。坎坷歷盡天不死、持節回來報天子。迴腸斷盡十九年、茂陵秋草悲何似。追思先帝眷彌留、齎金續嗣聊相酬。麒麟閣上八十一、耿耿苦節誰與儔。相知以心究冰炭、望鄉臺上空懷憂。河梁泣別已萬里、老臣朔望還春秋。回首群羊應化石、北海依舊風颼颼。

根香圃詩集

馮球

先生字輯五、鄉籍龍山旺村、清代布衣、著有根香圃詩集。見溫肅輯錄之龍山詩錄卷下。

沙灣漁父詞

家住東坡亭外山、煙波鎮日不知還。月明欸乃歌聲起、知是垂楊第幾灣。  
柳邊輕拂釣絲風、醉捲漁車臥短篷。偶向東坡亭下去、月明高唱大江東。  
五月鱖魚上釣肥、楊花如雪糝簑衣。夕陽古渡漁竿客、閒看灣頭白鷺飛。

欣所遇齋詩集

馮來蕃

先生字翰芸、鄉籍龍山旺村、清代諸生、著有欣所遇齋詩集。見溫肅輯錄之龍山詩錄卷下  
霜痕

年年霜信報秋歸、楚水吳山入望微。岸葦遠凝千點玉、江楓初展一林緋。馬蹄踏瘦餘殘露、鴉背翻寒帶落暉。多少前途拖葛屨、堅冰誰是早知機。

棲雲山人詩草

馮肩

先生字步莊、鄉籍龍山旺村、清代諸生、著有棲雲山人詩草。見溫肅輯錄之龍山詩錄卷下  
壬戌正月初五偕溫杯湖梅環中遊白雲洞有感

泉石無殊院宇非、廿年前事記依稀。吟聯攻玉寒柏倚、坐遞流杯醉共歸。游客已分今昔感、白雲何獨去來飛。他時世務粗能了、重整山林願不違。

倚魚山閣詩集

馮培光

先生字晉藩、鄉籍龍山旺村、清代附貢生、候委訓導、著有倚魚山閣詩集、事略詩草、見溫肅輯錄之龍山詩錄卷下。

從軍行爲家守信參戎昆弟而作

江南江北塵氛起、母有四子役三子。十年不返功未成、望汝弟兄聞雁聲。雁聲雖到無消息、天際浮雲渺何極。一子忽歸爲母言、兄守弟戰無晨昏。母曰嗟哉吾有子、男兒立志當如此。

乙卯上巳倪雲癯招同何小範周穎峰溫筠栖集署齋

誰繼蘭亭會、雲林有遠孫。鶯花三月暮、煙水幾家村。冷雨客攜榼、濕風春到門。消寒憑酒力、閒署笑言溫。

秋田詩稿

馮秉芸

先生號潔生、又號秋田、鄉籍龍山旺村。詩章見溫肅輯錄之龍山詩錄卷下。

秋日過澄觀園舊館哭溫材生五首錄二

鵝黃鴨綠未棲鴉、寂寞書窗掩絳紗、淚洒枝頭紅簇簇、乘風化作杜鵑花。  
昔年文酒細重論、此地鴻泥贖雪痕、風入松間留一闋、秋來無處不消魂。

偶感

仙佛原來共一塵、半塗墮落幻中身。老來每憶成童日、窮極遍逢暴富人。縱有阿同非小鄭、并無孟氏接芳鄰。莊生解與骷髏語、投筆從戎欲問津。

郊行吟草

馮卓英

先生字越儔、鄉籍龍山、清同治丁卯舉人、官甘肅隴西知縣。見己巳版順德縣志選舉表、詩一章見南海余少飄編之廣東歷代詩鈔卷四。又見溫肅輯錄之龍山詩錄卷下

暮春郊行

平原極目少人煙、草色芊綿綠接天。山影淡看雲腳外、野花紅到馬蹄前。不聞鶉鴉鳴聲徹、時聽馱騾鐸韻圓。因憶故園春事好、新苗挹露滿平田。

雨後雲瀑亭觀瀑二首

七十二峰頭潑墨、傾盆勢壓洞天黑。飛湍陡落千丈強、裂峽猛逾五丁力。四壁招邀鸞鶴賓、一身住在水晶域。山靈狡獪弄神通、放出白龍波翼翼。  
白龍噓氣林巒暝、噴薄風霆爭角勝。雪浪橫飛落酒杯、佛岩搖動流清磬。留題三字挹芳馨、淨洗雙眸獨清醒。笑語天公漫放晴、相看不厭危闌憑。

醉吟遺稿

馮達昌

先生字巨川、一字介厓、鄉籍待考。清代諸生。性嗜酒、工書法、爲詩則脫稿輒隨手佚去

不存。見番禺凌揚藻評輯之嶺海詩鈔卷十八。

佛山竹枝詞

海關關接廣州關、只隔盈盈水一灣、風月自來無例稅、滿船裝去復裝還。

前題之二

沙口西流柵下潮、中間直出省城遙、東西北路三叉水、那得郎君心一條。

天籟之音

馮全

全、鄉籍待考、漁父之女、舟泊東海、善口占、蓋出天籟而自鳴者、見溫汝能纂輯之粵東詩海卷九十七。

曉起

早起推篷月尚明、又聞蘆荻撼秋聲、梳粧對水爲鸞鏡、淡淡家風見世情。

寒衿吟存

朱氏

夫人鄉籍待考、清代李朝昊之配室、事略亦待考、見溫汝能纂輯之粵東詩海卷九十六。

悼亡

何以人間世、悲秋未有涯、涼風吹落葉、明月入幽懷。影痛生前隻、行將死後偕、孤墳三尺土、難把我愁埋。

梅花

欺雪欺風未肯降、橫斜疏影獨臨窗、終朝靜對寒衿坐、鐵笛吹來別一腔。

斑竹簾

湘妃貞節淚猶存、一幅垂來正掩門、恨捲春歸穿燕剪、愁看月到透花魂。日長階草臨青色、風動池波映綠痕。玳瑁梁間寧守信、酒旗休與掛煙村。

清白堂集

劉雲漢

先生字倬之、一字卓之、鄉籍逢簡。父振國、清順治辛卯舉人、官歷真定理刑、早著廉明之聲。兄雲鵠、以詩律書法負時名。先生更顯門閥、登康熙丁丑、公元一六九七年進士、平生工書善詩、都中名流、皆樂與交遊、爲世器重。惟畢生無意仕途、與父同輯有清白堂集。列傳見咸豐縣志、詩章見溫汝能纂輯之粵東詩海卷七十三。

海潮寺題壁

緩步忘山遠、耽吟與世違。煙霞真似我、晨夕戀禪扉。木落天風寂、山寒草氣微。惟餘喧澗水、東向學潮歸。

遊觀翠岳

蘇碧微微一徑陰。欹崖古木閉蕭森。暝開日色晴當午、瀑遞岳光冷到心。祇有鬼神司洞穴、更無雞犬集泉林。何時卜築蝸牛舍、風雨寒宵試苦吟。

蝸寄山房詩草

劉靖

先生字宇上、一字寧菴、鄉籍待考、清代諸生、著有蝸寄山房詩草。見粵東詩海卷八十二  
秋日泛舟西湖

一葦西湖上、追涼盡日遊、雲開雙塔迥、風急萬松秋。擊楫翔蒼隼、衝波起白鷗。溯洄翹首處、杭穎許同否。

春日客中即事

海燕尋春至、征鴻度嶺歸、微禽猶得所、憐我獨無依。

虎門

小虎山連大虎山、百川朝日匯雄關、太平不用時防險、緩帶將軍盡日閒。

劉氏存稿

劉扶山

先生名杰、鄉籍待考、詩一章、見龍山陳緯南公遺稿手書清詩拾萃。事略未詳。

詠武侯

紛紛割據策群豪、誰及隆中抱膝高。才壓鳳雛方管樂、心懸龍種謝孫曹。河山天已三分限、風雨師猶六出勞。堪笑史官爭帝魏、更將勝敗短鈴韜。

白溪家訓

劉蘭雪

女史鄉籍容奇石閣坊、清同治末年隨祖父白溪翁參加二山文會雅集、其詩僅存二首、見公元一九九三年順德詩詞學會成立出版順德詩詞第一期之歷代先賢詩選。

清明節

萬戶千門柳色新、北邙荒草沒麒麟、閨中未識先賢塚、惟向書堆拜古人。

養蠶

不休更不寐、三伏蟄蠶房、生計長如此、羅敷樂採桑。

雨湖吟草

劉潛蛟

先生字躍然、一字雨湖、鄉籍待考、扶山之次子、幼承庭訓、年十四、已善書法、臨前人法帖而似之矣。見番禺凌揚藻評輯之嶺海詩鈔卷二十三。

清遠峽

二禺南北分、顧盼若仇匹。七十二峰巒、雲氣互綿密。就中界長江、玻璃映朝日。崖石疑倒懸、足躡身戰栗。樛偃林壑間、向背誤蹊術。渺渺玉環蹤、寂寂埋香窟。鼓勇跨峰巔、心目陡開豁。



季子吟稿

郭勳

先生字季庸、鄉籍待考。清代諸生、見溫汝能纂輯之粵東詩海卷六十三。

訪四無師

築室傍園林、幽棲一徑深。門前生百草、壁上掛孤琴。靜有香雲入、閒無俗事侵。遠公能結社、漸少出山心。

秋日同四無上人舟中作

花底木蘭舟、垂楊夾去流。偶尋蓮社約、得及海門秋。漾水城樓出、參天島樹浮。徘徊殊不覺、吹笛向前洲。

登馬鞍山

北郭新秋色、招攜及此晨。江流中古在、松徑逐時新。細草千家墓、寒城兩代人。越王朝漢處、欲覓但荆榛。

望海門

扁舟乘興渡春潯、極目滄溟思不禁。五嶺南來諸郡淺、九彝東接一門深。天邊風撼濤聲壯、地角帆歸雨色沉。蹈海未成疇昔願、半生惟有魯連心。

松岡劉氏莊

荒山戶小縣猶貧、薄地爲農更苦辛。數畝預田頻有役、幾家茅屋靜無人。穿籬竹筍還爭發、映水桃花只自春。欲問武陵何處是、願逃人世不知秦。

秋懷

海國風高馬正肥、新人歌舞舊人悲。松楸古墓麒麟冷、禾黍空城燕雀飛。暮日暗愁聞畫角、秋郊黃落見斜暉。嶺南自古繁華地、回首煙花事已違。

晚香圃吟稿

邱士超

先生字秀楠、一字與凡、鄉籍龍山岡頭、清代諸生、著有晚香圃吟稿、事略與詩章、見溫肅輯錄之龍山詩錄卷下。

六如亭

古木鎖殘陽、幽亭接大荒。偈消生死恨、魂返有無鄉。夢破三摩地、情牽五種香。會歸清淨土、掃垢禮空王。

樵西山寺

我行深寺中、不與一僧遇、小鳥啄苔痕、見人始飛去。

樵西秋夜

月夜坐深宵、簾前花弄影、斗室一燈青、涼颿撲窗冷。

南園詩社

曲江風雅創騷壇、社啓南園愈改觀、吟向抗風軒內沼、碧波搖漾起文瀾。

越山詩社

屋結青蘿久閉關、伯鴻登酒共追攀、誰從三百餘年後、爲訪詩壇問越山。

訶林詩社

開於楨伯繼秋濤、風雅登堂品價高、瀟灑軒前餘韻在、至今人尚說詩豪。

浮邱詩社

大雅堂前久罷吟、尚傳仙吏此鳴琴、於今豈乏黃光祿、挹袖誰修翰墨林。

玉山樓前祀粵中九賢今改觀音閣

九賢勳德重南州、越秀山巔祀事修、一自普陀香火盛、無人知有玉山樓。

雲廬吟草

邱庭照

先生字抱月、號雲廬、鄉籍待考、清代貢生。生平嗜酒工琴、絃音到處、常使人或喜或悲而不知涕之何從云。見番禺凌揚藻評輯之嶺海詩鈔卷十六。

不寐

耿耿夜如年、青燈共短篇、膽從驚後小、心覺老來堅。遺俗應招謗、高懷枉問天。知交零落處、惟有一潸然。

綠窗庭課吟卷

邱掌珠

女史鄉籍龍山、乃清代諸生邱士超之女、年甫及笄、詩卷已哀然成帙、時賢黃香石稱其緣情寫志、騁秘抽妍、清才也。著有綠窗庭課吟卷。見番禺凌揚藻評輯之嶺海詩鈔卷二十四

潘氏園林

藍田卉木爭榮處、就中聳出楊桃樹。婆娑美蔭最宜人、白日爽颯疑風雨。當年手植寄亭翁、聚徒講學居其中。吾翁少時實與此、恍如一月坐春風。哲人歎爾登仙錄、嗣君靜對悲風木。珍重閒階手澤存、濃陰布處如空谷。莫嫌結實實偏酸、莫厭著花花不馥。香淡應無俗客探、味酸恰稱儒生腹。主人倚檻發長吟、滿目龍蔥作賞音。有時濡毫恣灑墨、墨花染處交枝黑。好香一炷花一瓶、四時並映高樓側。來從絕域是何年、易地爲良味不遷。名園嘉木亦何限、品題幾度開瓊筵。盛衰轉眼如翻掌、一朝摧毀終堪憐。何如此樹有奇遇、年深挺秀凌雲煙。我賀此樹得賢主、兩世栽培手摩撫。長辭剪伐侶幽人、勝老寒山及煙渚。

謝歐陽文慎思惠酒

深林寄傲四月天、有酒欲沽囊無錢。鸚鵡之裘典已盡、麴神斷絕廚蕭然。詩叟欸賜松花釀、痴兒拍掌爭流涎。招邀鄰嫗共斟酌、竹陰坐聳雙吟肩。丁娘子布去年贈、輕軟絕勝同功綿。

更憐苦吟喉吻燥、遣致綠螳浮舫船。三杯扶頭恰犯卯、胸次塊磊一蕩焉。

山家

風裊垂楊綠拂牆、坐中時透野花香、靜如太古無餘事、與客談詩到夕陽。

家大人命錄嶺南詩諷誦之餘賦此書後

天南煜離明、文士得其半。殘膏授綠閨、粉膩爭炳煥。今錄嶺南詩、名媛喜璀璨。繕存几案旁、時時一把玩。自恨學殖荒、騷雅愧淹貫。庭訓義有疑、無人可問難。閨閣寡交遊、行不出里閭。檻外聞嚶鳴、求友聲相喚。

讀嶺南閨秀詩偶成

美人珠璣浣腸胃、咳唾含香有清致。貯腹長舒卷軸光、摛毫自具煙霞氣。仙姑吐屬何清新、瓊臺我愛邱夫人。鴛鴦繡處金鍼度、下筆輸君能有神。

雲林社吟稿

丁炳作

先生字曜東一字鑑湖、鄉籍待考。流寓粵西、充兵馬司吏目、嘗與黃謙受輩結雲林社於梧州之金蓮菴、爲唱酬之會。見番禺凌揚藻評輯之嶺海詩鈔卷十六。

梧州竹枝詞

榕墟村口人焙茶、榕墟田畔稻開花、千株棗樹經郎種、遮蓋長洲十里沙。

雨舟吟稿

康霈

先生字雨舟、鄉籍待考、清代布衣。見溫汝能纂輯之粵東詩海卷九十。

旅中九月

去歲今朝也在家、今年此日客天涯。白衣不送他鄉酒、黃菊空聞故里花。南雁啼霜衣乍冷、西風吹帽鬢將華。高堂尚有慈親在、恐倚柴門望日斜。

稼堂存稿

楊一夔

先生字毅嚴、鄉籍待考、清代諸生、著有稼堂存稿。見溫汝能纂輯之粵東詩海卷八十二。

拙僕

我不如渠好、痴歎性所安。任人生喜怒、於己澹腸肝。時或古愚似、焉知拙計難。忘機閒與語、爲有笑相看。

秋日檢讀梁自文先生遺札戚然感賦

九原不可作、天氣復深秋、一紙八行字、傷心萬古愁。語猶聞慰藉、事倍痛交遊。師友生平誼、青燈涕欲流。

荻花

瑟瑟荻花秋、蒼蒼霜氣浮、空江一片月、煙水滿汀洲。鷗鷺時翻羽、漁翁已白頭。伊人何處是、惆悵泛中流。

九日集海山樓同賦

百尺樓開嶺海間、攜壺欣得共躋攀。節逢勝會猶遲菊、人但登高即當山。望極遙天心並遠、喜兼良友病初閒。珠江一帶諸峰小、點染秋光入醉顏。

礪山詩草

楊邦

先生字作其、號礪山、鄉籍桂洲、清乾隆壬午、公元一七六二年舉人、著有礪山詩草、事略見咸豐縣志、詩章見溫汝能纂輯之粵東詩海卷八十四。

出都門作

薰風拂袖整歸鞭、翹首鄉關興浩然。五色文章蛺蝶錦、一溪煙雨素馨田。尚存吾舌供吟句、未盡囊金作酒錢。爲報閩人歸有日、蓮花開後菊花前。

鵝陽草堂詩稿

楊子鈞

先生字平之、一字匡山、鄉籍待考、清代貢生、官歷湖南州判。以親喪回原籍守禮、遂不復出仕、讀書白雲山、復置鵝陽山莊以居、罕涉城市。著有鵝陽草堂詩稿、見番禺凌揚藻評輯之嶺海詩鈔卷十八。

淮陽園寄胡兼山

憶昔滄州兩載羈、山城風雨共題詩、如何歸後家林近、不及當年作客時。

秋航吟草

吳梯

先生字雲川、一字秋航、鄉籍黎村、清嘉慶辛酉、公元一八零一年解元、官歷內庭校錄、蒙陰縣知縣、善與人交、與同里黃侍御小舟尤篤、有古人風度。事略見咸豐縣志選舉表、詩見番禺凌揚藻評輯之嶺南詩鈔卷十八。

冰床行

南人駕船如駕牛。北人坐車如坐舟。有船無舵車無輪。非水非陸鏡面遊。渡曰冰渡郵冰郵。厥製奇創初誰修。長尋廣半高略侔。竟體板椽多松楸。板窮設鐵橫雙矛。方上銳下動所由。坤初剝四象義幽。小狐既濟往無尤。繫辭說卦偶未收。窮冬觸發凝河流。玉河平底去路悠。路旁林立冰人儔。殷勤邀客脫布裘。布置妥帖充裊裊。容膝促坐衣欲摳。後坐床尾先床頭。三三五五貉一邱。前施短繩轡之柔。受以肩背馬上鞦。手如叢播腰坐篋。編毛作履脛不憂。竦踊捷走來猿猴。五十步後騰身休。餘力所及勢更遒。一往何啻箭注侯。飛輪平碾白玉洲。玉塵不動天浮浮。坡移岸走風颼颼。江行景色紛盈眸。翻嗟道不阻且修。顧盼已至三錢酌。勞多獲罕日幾周。磨驢陳跡團團愁。夏王四載歷九州。山樛澤蘊製備留。冰行乘床乃獨否。後人智豈前人優。中有至理君幸求。

古人今我齋詩集

吳維彰

先生字晦亭、鄉籍待考、清嘉慶丁卯舉人、有古人今我齋詩集。事略與詩章、見天津徐世昌編之晚晴簃詩匯卷一百一十九。

汾江送家敘敬之遷江

古渡落黃葉、西風江上愁。何堪長病客、復送遠行舟。海色黃牛暮、灘聲白馬秋。相思若汾水、千里共悠悠。

中宿峽

江流輕帆、入峽忽瞬息。二禺突兀來、瞥眼若新覲。曦輪晨無光、天瘦壁面窄。陰崖蓄孤高、勢與陽崖敵。草木胎精華、暮冬見春色。蒼茫雲水間、氣候太古積。夙聞二帝子、高栖有遺宅。截竹鳴鸞鳳、天吹空遙憶。葛洪與達摩、窅窅仙佛跡。孫恪亦奇緣、歸猿何由覓。勝事煙雲流、往轍成故昔。余亦片時客、百年幾覽歷。風塵念前途、對景倍珍惜。長羨飛來僧、真機守靜默。

滇陽峽

雲端懸雙崖、鬼斧劈劍閣。韶州雄峽江、天險此開鑿。飛牽何迢遙、百丈下無泊。仰穿梯磴牢、俯覺坤軸弱。山風虎毛腥、野果猿臂落。行人慘不歡、絕壁孤影著。滇流向轟騰、合湊險較惡。龍頭高昂藏、鼈背奮磅礴。往往爭迴瀾、千篙一石搏。生非輕江潭、性命駭窮薄。山童歌牯牛、出峽如夢覺。

寄逢石

珊瑚洲上越王臺、漠漠扶胥海色開。黃木瘴消炎日上、白鵝風急怒潮來。錢山使者降蠻策、銅柱將軍馭虜才。君上城南閒眺望、坐愁章句老蒿萊。

汾江夜別黎蒼雪

契闊恩方重、艱危命易投。死生雙涕淚、風雨一扁舟。野火明山屋、寒更出海樓。猶疑川上望、回首荻蘆洲。

顯翁吟稿

尤庚

先生字顯立、鄉籍待考、清代布衣。見溫汝能纂輯之粵東詩海卷九十。

燕影

似曾相識是耶非、隔檻差池取次歸。春社幾家花月朗、夕陽一片柳風微。寶釵化去情猶在、翠幕棲來夢欲違。莫向昭陽宮裏去、恐人嗔汝鏡中飛。

迎寒曲

新雁一群驚、哀蟲四壁聲。城南有戍婦、夢裏聽分明。

梅軒集

湯金英

夫人鄉籍待考、清代才女子、父湯子鳳、亦待考。著有梅軒集、見溫汝能纂輯之粵東詩海卷九十七。

早秋夜雨喜作

庭前靜坐意何求、疏雨涼風應早秋。幾樹竹聲侵屋角、一痕燈影照牆頭。波紋簾上銷除熱、霜冷籬邊卻去愁。寄與農家好安寢、滌將場圃待盈篝。

送燕

海國烏衣剪剪飛、梁間空壘夢應稀。臨岐對爾無多囑、莫厭主人貧不歸。



石洞遺草

釋元覺

釋字離幻、晚居羅浮山石洞、因以爲號。乃俗家簡氏之子、爲雲門寺宗符和尚嫡嗣、受剃度、復禮棲壑受圓具、偏參諸方、往來吳越之間、旣而歸覲宗符、及宗符示寂、遂繼主法禪林、大興雲門之道。平生坦懷接物、禪律兼通、才品並茂、四方學者多從之遊。後往循州、遊羅浮、經石洞、愛其岩壑幽勝、築室居焉以終。列傳見咸豐縣志、詩章見溫汝能纂輯之粵東詩海卷九十八。

歸鼎湖作二首

大道原無住、斯行亦偶然。片帆懸渡口、孤棹入湖天。山色留前古、溪聲送暮年。江心應有月、松際幾時圓。

世事多留難、山心誰與期。行當衰老日、況值亂理時。定水呈空色、閒雲寄所思。故交應有念、前路莫遲遲。

題寶積寺

亂餘山路少人行、古寺閒花滿徑生。鐵鑄眞僧重過火、土顏金像不知名。石幢有咒雲常護、香閣無基草自平。頭白樵夫頻向說、十年岩壑罷春耕。

送蔡伯昭歸潮陽兼遊羅浮

先生歸去更何之、牢落殘年是別時。投老有心求至道、旁人何事悵臨岐。仙洲漫採長生藥、石洞應留舊日詩。歸去靈山深處隱、閒雲來往定何期。

慧弓吟草

釋開訶

釋字慧弓、號石箭、鄉籍與年代待考、乃俗家張氏之子、年方十七、矢志出家、禮在翁和尚於金龍精舍、年二十受具足戒、研究經律、多所發明。後赴粵西傳法、發願以度衆生、

歸經平樂途次、遽往西天。列傳見咸豐縣志釋家篇、詩章見溫汝能纂輯之粵東詩海之卷九十八。

三昧潭

崖削谿迴空太險、不因吾汝豈稱奇。道心臨水淡然妙、臺石承跌真所宜。幽鳥窺人棲樹靜、靈池聞法起潭漪。日斜殊欲無歸去、千載空令憶智師。

羅浮詩稿

釋源子

釋世居縣城之北、俗家吳氏之子、早年出家、住廣州河南海幢寺爲僧。嘗遊羅浮有詩、惜緣性質高邁、每負才華、傲視僧俗、乃與衆不合、晚而退居小金山、旋而圓寂、遺著羅浮詩稿、藏大良寶林寺。列傳見咸豐縣志。詩章見羅天尺編著之五山志林。

舟抵石龍望羅浮

勞生擾擾鬢毛斑、杖底乾坤日月間、未到羅浮先一笑、石龍江上看青山。

香溪曲

朱明洞口日月光、白水門前瀑布長、一雨春風百花落、萬峰流水盡成香。

黃龍洞觀瀑

昔日黃龍現此峰、石樓西畔水淙淙、我今獨上峰頭望、不見黃龍見白龍。

洗心石

少讀萬卷書、老至字不識、日暮來洗心、崖前三歎息。

雨阻未至鐵橋和西峰

空山風雨來、雲白總成海、惟恐鐵橋沉、流出羅浮外

何竹平先生輯集

# 近代詩林

伍宜孫題



詩集	作者姓名	頁次	詩集	作者姓名	頁次
山外集	岑學呂	三七五—三八六	難兄畫中詩	梁鼎銘	四四八
南洲吟草	岑君任	三八七	難弟畫中詩	梁又銘	四四八—四四九
夢蝶詩存	伍憲子	三八八—三九五	歸夢集	梁隱盒	四五〇—四五三
九江薪火	伍仲珮	三九六—三九八	梁氏詩草	梁頌豪	四五四—四五五
綠園詩稿	伍景英	三九九—四〇二	簡齋詩草	梁簡能	四五六—四六四
蒹葭樓詩	黃晦聞	四〇三—四〇九	端正遺風	梁端卿	四六四
負暄山館詩鈔	黃偉伯	四一〇—四二五	拙存堂詩	黎澤闈	四六五—四七〇
欣園詩文集	黃維瑁	四二六—四三一	逸齋詩稿	黎葛民	四七〇—四七一
雲波詩稿	黃芸博	四三二	蒿庵詩稿	黎暢九	四七二—四七八
芸香寄廬	黃香林	四三二	心齋詩詞	黎心齋	四七九—四八六
小園詩存	尤列	四三三—四三六	玉蕊樓詩餘	黎季裴	四八七
借隱移詩稿	胡伯孝	四三七	龍山閒吟	陳緯南	四八八—四八九
落花詩稿	胡廷燮	四三八	蘊廬詩草	陳荆鴻	四九〇—五〇二
春風餘韻	胡兆響	四三八	健社嚶鳴	陳泰來	五〇二
世德堂詩聲	胡景石	四三九—四四〇	行素存篇	陳蘭生	五〇三
畫虎題詩	胡藻斌	四四一—四四二	金翁遺稿	陳鐵兒	五〇四—五〇五
覺民吟草	梁元任	四四三—四四四	一樓遺吟	陳介行	五〇五
花石主人詩	梁育儂	四四五	天健行吟	陳伯乾	五〇五
山水有清音	梁伯譽	四四五—四四七	陳門婦德	陳王慕潔	五〇六—五〇七

強志齋詩	溫中行	五〇八—五一二	晚霞吟草	老維平	五四九
媚秋堂詩	馬武仲	五一三—五一六	覺道人畫題	劉一菴	五五〇—五五二
雙玉樓詩	馬黃珏	五一七	癸丑吟	劉崱宇	五五三
知非樓詩	麥君澤	五一八—五二三	南社吟草	葉敬常	五五三—五五四
劍廬遺稿	麥劍影	五二四—五二九	南社吟侶存稿	蔡行嚴	五五四
棲鸞館吟草	麥健臣	五三〇	寒瓊遺稿	蔡守	五五五—五五六
馮公詩存	馮漸達	五三一—五三六	唱隨遺稿之一	蔡張傾城	五五七
英年之音	馮天佑	五三七	唱隨遺稿之二	蔡談溶溶	五五七
健社先聲	馮炳奎	五三七	樂觀室詩集	潘學增	五五八—五六五
南社嚶鳴	張處萃	五三八	花溪吟草	潘伯陶	五六六
鈍公詩存	張庶平	五三八	一觴一詠	潘景封	五六六
瓊州全誌	張敬銘	五三八	餐英樓主吟草	潘潔夫	五六七—五六九
旅途彙稿	張谷雛	五三九—五四〇	英年詩稿	潘家豪	五六九
佛酒樓詩草	張丹	五四一—五四四	微齋韻言	歐陽澄	五七〇—五七五
羅氏詩稿	羅子文	五四五	六一遺風	歐陽傑	五七六
南社唱酬詩	羅賽雲	五四五	覆瓿集	歐陽雪峰	五七七
南社天聲	羅志遠	五四六	聽蟬吟室遺稿	歐陽韶	五七八—五七九
秋思吟	羅志安	五四六	健社存稿	歐祥光	五七九—五八〇
新雷之聲	羅文顯	五四七	知止吟草	左端本	五八一
借山嗣響	羅漢榮	五四七—五四八	拾翠軒文藝選集	周益伯	五八二—五八八

海隅之聲	連普英	五八九—五九一	如月欺雪吟	關惠瓊	六二一
旅美詩選	譚良	五九二—五九三	寶箴詩存	何寶箴	六二一
琴堂逸響	方德華	五九四	儒門妙悟	何晴和	六二二—六二三
無亂耳吟草	霍竹生	五九五	萬茂草堂題畫詩	何漆園	六二四—六二五
璇璣餘韻	蘇若蕙	五九六	鏡翁詩存	何鏡宇	六二六—六二七
菊花大會詩	徐漢銘	五九六	笑夢樓詩	何小孟	六二八—六二九
自珍存稿	賴百超	五九七—五九八	醉紅館詩	何唐煦春	六三〇
布衣餘韻	賴定中	五九九—六〇〇	覺翁遺稿	何蒙夫	六三一
亦云集	杜啓芝	六〇一—六〇二	廬江詩聲	何憬存	六三二—六三三
大寶草堂詩鈔	杜志揚	六〇三—六〇四	帚珍軒稿	何式南	六三四—六三五
碧翁遺稿	梅叔蓬	六〇五—六〇六	醉吟社小集	何華	六三五
笛雲之聲	尹燿	六〇七	杏林吟草	何永元	六三六—六三七
壽世餘音	鄭璧文	六〇八—六〇九	涉趣園詩	何智煌	六三七
名山吟草	楊柳	六一〇—六一一	循環韻語	何錫銘	六三八
林氏詩稿	林壽愷	六一二			
正聲吟社詩稿	鄧紹光	六一三			
遺興之音	李葆天	六一四			
勁菴詩存	李棧	六一五—六一七			
繩武之聲	李曲齋	六一八			
晚芳園畫屋詩	余曼陶	六一九—六二〇			



師尚公遺像

師尚公人志事選輯

吾人晚年隱居九龍山中，日以筆硯結緣，  
 自創學區一家，就友多，志不釋，求深門  
 求學，若門限，如穿，平生志為著述，餘志  
 亦多，兵燹，幸在，志性，隆，南，蒼，灣，防，尚，山  
 畫中，藏，百，以，十，幅，而，已，多，成，新，家，叔，世，起  
 公，移，家，北，美，州，亦，部，歸，內地，家人，近，百  
 幅，畫，博，為，係，存，因，里，遠，著，以，書，翰，至，公  
 先，祖，一，生，心，血，之，可，漱，黎，珍，逾，拱，壁，至，意，存  
 傳，之後，慧，遂，與，諸，弟，協，友，將，僅，在，選，著  
 數，意，以，做，姑，祖，影，印，外，又，有，之，圖，十，年，亦  
 將，遺，墨，攝，影，輯，存，一，刻，似，子，孫，後，世，亦，刊  
 夕，觀，策，卷，二，刻，或，生，能，追，慰，先，祖，生，於，心，願  
 而，猶，儂，泉，下，志，求，不，致，埋，沒，先，人，之，貞，秋，也。

慎終追遠

公元一九八二年，在陽節後，長孫堂中敬錄

山外集

岑學呂

先生字伯渠、鄉籍容奇、生於公元一八八二年。壯歲宦游南北、歷任蒙藏委員會總務處處長、廣東省政府委員兼秘書長、代省長等要職。抗日戰爭時流離湘桂、兒孫散處四方、極顛沛之苦。及倭寇稱降後、一度出任順德議會議長、爲桑梓服務。其後流寓香江、隱居荃灣山中、顏其居室曰師尚草堂。先生氣節耿介、兩袖清風、閒來栽花念佛、賴賣文鬻書以養天年。公元一九六三年、歲癸卯三月初九日、卒於先生之次子雲起之港寓、身後只書卷一榻。遺著有虛雲和尚年譜、重修曹溪通志、選錄天然和尚詩、真書佛說阿彌陀經及山外集附憶得集等傳世。

自序

丁丑夏謝政後、隱居九龍山中、修蘇晉之長齋、伴賈島而念佛、似僧有髮、在俗安禪、折腳鐺邊、倏焉五載、間爲小詩、題曰山中集。辛巳歲暮、太平洋戰起、烽火連天、九州南盡、倉皇避地、北來五嶺、山中書物想付劫灰矣。比者、風塵作客、竿木逢場、以出岫之孤雲、類遼天之野鶴、流行坎止、且聽自然、又何必如韓康伯絕長安之市哉。詩不多作、興到成吟。賡置此編曰山外集、雲水蹤留、雪泥印在、人間遊戲、何者非禪。壬午（一九四二年）八月學呂記於耒陽鳳雛亭北之怡廬。

壬午夏違難內渡至廣州灣舊好攀留游讌豪侈逾平原十日之飲臨別賦謝附註：公曆一九四一年十二月八日（辛巳十月二十日）日寇以飛機五十架空襲香港、太平洋戰遂啓、閱十八日而香港淪陷。時余居九龍荃灣山上、晝防日寇、夜防土匪、以此地大小寺院俱被洗劫、余督同村人及避難來寺之壯丁檢獲英兵棄械、設防守禦、使留此僧尼及百餘婦女幸免於患、守月餘、糧漸盡、秩序稍定、乃挈眷下山、輾轉內渡。



宋王臺火燭青霄、不許寒山伴寂寥。九死未忘逃劫罇、餘生何幸託天驕。酒泉列郡封金印、繡閣題名倚玉簫。爲謝親朋能醉我、可堪風雨又明朝。

遂溪道中時壬午五月十三日

半山半水半田陂、漸近登場早稻期、十里酒亭遲過客、依稀猶是太平時。

柳州時壬午五月十七日

昔人已見柳州柳、今我來看山外山、曲折柳江帆影亂、一般風景似荃灣。

灘江舟中日夜警報五次有深夜三時者

江水悠悠夜氣清、七星巖上月微明、無端驚破漁人夢、警報傳來第五聲。

南華寺謁虛雲老和尚

兩月以來渾似夢、行船走馬又看花。故人滿眼容乞食、蘇小同鄉許住家。襟上酒痕痕是淚、耳邊聲浪浪淘沙。飄然直入曹溪去、消受禪師一盃茶。內渡至遂溪湛江而桂而衡而韶車馬疲勞乃入南華謁虛雲本師意求解脫

入湘時壬午六月初三日

竭來何故入湖湘、一例哀鴻逐稻粱。滅刺已拚容老病、出山依舊費商量。千金養士吾終愧、八斗充儲計亦良。閒向鳳雛亭上坐、本來龐令是清狂。戰時湘省行署設耒陽城北鳳雛亭余寓在亭之北怡廬文內八斗是指官糧而言

零陵山中所見

亂山深處野人家、黯黯西風日又斜。林翳可容飛倦鳥、巖幽自媚耐寒花。兒童放學催炊飯、過客憑闌待點茶。如此風光殊不負、爲誰流浪向天涯。

怡廬初菊

涼風吹過野塘來、漸覺秋花著意開、頗似老夫甘寂寞、正宜爲汝一徘徊。酬茲佳日偏無酒、生不同時豈獨梅。此地初逢人亦淡、未須重問是誰栽。

夜讀楞嚴經

三世諸佛一鼻孔、添香換水意何如。偶從文字得般若、笑向曼殊問起居。情與無情蕉幻鹿、樂其所樂我知魚。推窗又見繁星動、世界無窮願未虛。

喜廖桐史書至

六年別矣雙清館、歸夢常尋江水湄。與子孤懷抱冰雪、幾時相對愧鬚眉。亂離人事寧能問、氣類文章漸感稀。野史待刪吾輩在、故山無恙待雲歸。時君居淪陷區中謗言盈耳嗣得其書知君志行堅定事乃大白

王子琛自粵來別三十年矣索書而去

垂老猶爲客、相逢況異鄉。飲泉思莞水、征雁向衡湘。一飯遽言別、卅年應未忘。懷沙知有賦、不忍問行藏。余在民元出幸東莞時與子琛同事一別三十年壬午八月自粵來赴長沙就養

示定字孫

含飴喜見汝成童、能忍艱辛力學中。半壁疏燈供夜課、一犁寒雨事春農。家貧國難偏憐爾、宦拙名浮誤乃翁。破篋祇餘琴硯在、要期他日振吾宗。得長孫定字書入力行中學晨耕夕讀意頗憐之卅年薄宦無力資子孫讀書愧甚

壬午歲暮赴連縣三江視內及次兒雲起初孫

千山萬水巾峰嶺、白髮來看老病妻。種菜稚孫群跳躍、扶筇嫗互提攜。老僕相隨不忍言去三江野渡沙明水、一插天關日近西。晚景自娛遊未倦、更欣雛鳳試新啼。大兒伯毅有男女孫七人長者已識種菜

三江集日看徭民互市（物物交換也）

削出千峰萬疊山、八排東下鹿鳴關。三江互市兒童笑、一劍相隨氣象蠻。縛虎射鵰憑鐵臂、看花跳月賽金環。漢唐遺俗依稀在、禮失何妨問老獠。徭民蓄髮方袍腰掛短刀漢唐模樣明末曾起義抗清民族精神竟傳至今

壬午除夕送少花回衡陽風雪滿天重憶塞上

有史以來五千歲、除夕成吟幾輩詩。未見九州同浩劫、真成一局已殘棋。君今去問衡陽雁、

我欲重追塞上騎。極北天南看斗轉、靈風吹遍漢旌旗。

癸未元日得陳樹人自渝寄詩卻酬

卅年香海樓頭月、駢麗文章子最工。梁案吟成專愛集、鄭僑歸作主人翁。笑啼花鳥關天下、涕淚江山入雨中。所不能忘如此夢、庭柯還剩老來紅。光緒廿八九年曾與陳同執香港各報筆政提倡民族主義皆多已作古所存者無

幾陳爲居廉婿伉儷至篤有專愛集行世當時記在唯一報今陳任僑務委員會會長近十年矣

與雨山論戰史東吳亮儕時薛將軍請余編長沙三捷記

蟬魚閱世留微命、八表同昏紀事難。寧有名山藏野乘、未枯人海尚詩壇。虞淵日墜終收拾、杜老風微動感歎。我欲與君修戰史、不辭禿穎掃狂瀾。

臥病三月感懷身世成述感二十首

壬午當年月初三、我生之初嶺以南、六十餘年春似夢、鐘樓孤負老同參。余自疑前生爲一鐘樓僧人因頻夢至鐘

樓與一老頭陀話舊又按先生生於公元一八八二年歲次乃上一壬午

少年狂醉復狂歌、錫以頑童大石磨、早注磨人與磨墨、石猶如此我蹉跎。余家存一石磨徑三尺周九尺碾粉極細

余少年跳盪舉動殊常爲鄉人呵詈號爲大石磨頑童

喪亂孤兒子一身、南船北馬逐風塵、棄襦解甲渾閒事、筆下春蠶若有神。幼失怙恃孑然一身軍校畢業後薄不入

伍作小學教師及粵港各報記者數年每限於一小時內寫駢文千字爲常課也游大江南北委以吏事又棄去遂之南洋

金粉河山迷北極、榔椰風雨逐南溟、掀翻革命潮頭水、洗盡神州雨血腥。遍遊南洋群島英荷各屬辦學辦報及會

務至辛亥九月粵省光復即回國任都督府秘書此以在香港辦報之時與黃克強胡漢民等有深洽也

少年作宰蹈沽名、誤聽輿人有頌聲、晚悟乖崖悔早仕、畜牲縣令亦公評。余年三十一宰東莞三十二宰番禺均劇

縣治盜過嚴每多殺刃雖收效一時地方稱頌而造孽深矣悔之何及唐人謂外任縣令爲畜牲道

華省香沉冷玉堂、紫微值宿侍平章、十年誤我東華夢、依舊頭銜著作郎。

憶在國務院任交通部司法部各秘書時公餘參加晚晴蓀末座自壬戌秋入京後而樊樊山易實甫等繼來而羅癭公林畏盧諸公又按期來移雅集得及見同光前輩之風流亦幸事也

黑水白山餘霸氣、書生挾策又從軍。至憐帳下猶歌舞、吹散遼天一段雲。

民國十年後余隨某公出關與張作霖談中原軍事竟夕大喜邀入幕余卻之去後一年余又徇某公之請佐其子張學良治軍書者一年默察其軍容驕逸不及臥榻解睡人余乃又借事而去

偶因麋鹿倚邾戎、萬里行人禮數隆、莫論南強優北勝、興亡都付信天翁。

孫公中山在粵困於陳炯明移節桂林時段祺瑞派徐樹錚張作霖派余南行任調解及合兵破曹事卒擊破直系孫段張合作

復旦門開氣象新、龍吟虎嘯會風雲、借籌虛上弭兵策、又付春宵一夢痕。

段祺瑞執政孫公入京共商國事氣象一新余任軍事善後會議委員佐王士珍策畫戰兵方案未幾而孫公逝世南北又分南北軍閥又互鬥

十載寒山感舊遊、舊留題處閉重樓、無端移作桑江令、猶是桃花逐水流。

余兩度至鮑江均居節幕民國六年出宰豐順閱十一年至潮海有重宰東莞之命不三日改調揭陽余於事前皆不及知蒞任不久以軍事有變去職

霜天匹馬渡榆關、不用吾謀我獨還、前後兩年九一八、那堪回憶舊河山。

民國十九年初秋馮閻蔣大戰中州張學良電邀北上商量大計所見多岐余拒入幕至九月十八日張通電就副司令職瀋陽防事務至二十年同月同日為日本南滿軍砲轟佔領之事止隔一年

拂衣欲向滄江老、著述寧因為稻粱、盡盡百年興替史、藏山無地祇心藏。

余蒐羅近代史料已二十年欲歸著述前國務院總理梁士詒曾請編為政書梁謝世以印費鉅將史料刪去大半成今印行本爰將原稿藏之九龍荃灣山堂中亂後不知其存亡也

強將禿穎佐籌邊、點盡河山絳節懸、一卷文書聯五族、滿蒙青藏及回纏。

同學黃慕松奉使西藏余受簡任蒙藏委員會總務處長竭力佐黃擊畫邊政辦一月刊合漢滿蒙回藏各種文字以通政令

星添霜鬢始言歸、紫幕風雲願未違、誰料黃墟重過日、落花時節淚霑衣。

民國二十五年黃慕松任粵省政府主席余被任委員兼秘書長不及一年黃出缺余奉令代主席一月解職

差同白馬老投荒、築室空山古寺旁、青磬紅魚粗米飯、五年明月照山堂。

丁丑謝政後居九龍山中顏其居曰師尚山堂種菜自活足不下山者經年矣齋鼓粥魚自份與白雲終老矣編者按丁丑為民國廿六年公元一九三七年

荒邱老樹憩雙牛、不盡沉緜畫裏收、未負蘇黃閒筆墨、一時歌詠屬名流。

居山堂日朋舊時入山見訪老輩中如韓樹園張一畧江霞公楊千里黎季裴楊雲史黃慈博鄧爾雅鄧寄芳楊鐵夫唐天如等時來集會趙子百畫雙牛圖梁鼎銘胡藻斌作山堂圖卷贈余夫婦  
烽煙忽起宋王臺、東海揚塵又劫灰、畢竟修羅非淨土、更攜雄淚國門來。

公元一九四一年冬太平洋戰起倭寇佔九龍山中被兵乃倉皇內渡

片雲何意入湘南、柳栗橫擔覓草庵、似與哀鴻同一例、汝猶憐我我何堪。

歸國後至桂林某公欲留余幕中適接湘府王光海電乃決定入湘

五湖五嶽都歸去、南溟北塞今何處、側身天地感蒼茫、半生竟作因風絮。

海內湖山足跡幾遍北逾朔漠南泛滄溟把茅蓋頭今尚無所

一肩家國兩茫然、七處鄉心路八千、蠻觸未闌狂未歇、幾時重遇太平年。

抗戰後大兒毅伯挈眷居連縣次兒雲起居曹溪大孫在黎市幼女及二孫女居三江九龍山堂請比丘尼寶林主持故鄉家園則仗義友陳強保守余則暫止湘南

欲止酒廢詩答雨山並束葉天一

枯木能參欲廢詩、雨山告我逗生機。嘗聞物我無盡也、興來聊復一中之。寧取濁醪元自笑、不聞風月逞吾辭。欲止未止廢未廢、仰視星文有所思。

南華養疴喜李任潮至

一脈曹溪在眼前、是誰懷讓與希遷。不求解脫從諸聖、忍以狂禪誤後賢。滿地江湖舟欲墜、虛堂明月鏡孤懸。多君認取源頭旨、十日僧房對榻眠。

鄧寄芳年將七十避難河源夫婦同賃居斗室有尺地不容分枕榻夜來雙宿老鴛鴦之句癸未冬

又以梅花詩二十首來賦此調之

遙寄梅花詩廿首、河源風味抵孤山。似聞鄧尉留香雪、可許岑參賦玉關。尺地不妨天一角、初春應愛月雙彎、吟成惹得歸人惱、老態還須換笑顏。

甲申南華寺浴佛與曾仲清

龍象山前散紫霞、今朝花雨滿袈裟、脫胎本是同根性、爾我如來共一家。

憶別未陽時閏四月二十八日倭寇至因倉皇移家離此

不因驅使聽山川、去馬來猴亦偶然、壬午屬馬甲申屬猴兩載未陽未辜負、浣花遺韻北征篇。過去日誦浣花詩也

再住連縣大兒家時舊交雲集游宴無虛日至中秋後內子忽病歿年六十三歲子孫戚屬咸集

詩如繡虎酒如龍、三月連州足盪胸、也爲悼亡曾掩淚、薄寒微雨濕巾峰。

雪夜入雲門寺時日寇陷曲江虛雲老和尚由此派僧人接余途行二日乃達至則歲除矣

帶水拖泥到上方、偃師文偃禪師圖寂後肉身尚安奉在此深定寺荒涼、天花散滿供齋鉢、雪夜迎年禮法王。

乙酉端陽集湄園祭屈子同朋舊數十人

留連多士未羈孤、午日湄園祭左徒。漫說清談皆老朽、從來忠愍在江湖。巾峰岸幘天應問、香草沉羅子亦辜。曲直不阿心事異、自酬佳節酌菖蒲。

書感

士窮見節本尋常、恥以清貧易此狂。十載支離撓國難、三年遷客臥衡陽。生知垂老難爲用、野有流亡事可傷。劫火燼時天亦淚、窗前風雨夜浪浪。

聞日本投降喜賦

八表同昏血戰殷、捷音夜播瀝陬聞。妙哉原子參天地、久矣含辛動鬼神。劫後河山還屬我、樽前涕淚事因人。百年國恥今初雪、起視橫窗草木新。

歸舟經陽山至含洸時乙酉十月四日（公元一九四五年）

纔過三峽又含洸、水繞山環路正長、誰識詐顛來謫令、一船書畫米襄陽。

丙戌仲春爲邑城收復六月忝充縣議長席偕同人遊雪聲堂謁陳巖野先生墓彰忠節也

風雨淒迷泣杜鵑、錦巖山下有荒阡。忠臣孝子傳三代、嶺樹煙雲自一天。酒畔雪聲尋獨漉、

劫餘蕭寺剩天然、祇徇三百年前事、泥首靈旗落照邊。

丁亥初夏入南華小住友人傳余剃度者詩以答之

五年五度住南華、一宿真慚對永嘉。同此性源迷悟異、別關心地法門差。飯糲邊坐痴啼餓、業債餘生悔濫賒。老去自知艱負荷、已除簪笏未袈裟。

憶得集

余不善詩、五十歲以前多不存稿、即山中集亦已散佚、茲以編山外集、竟將憶得者附錄之、其憶不得者、向何處去、後有憶得者又從何處來、可以明禪、可以悟道、學呂識。

北京花之寺閨浴佛節名流百人雅集分韻得笑字歲維丁丑（公元一九二五年）

天光開翠微、霞彩周百竅。慈雲覆閭闔、佛天相映耀。時和景復清、德星資感召。說道合僧俗、選韻集老少。憶昔中令公、倚樹發長嘯。廿年望扶搖、頌聲滿清廟。憂樂有後先、攄懷認游釣。高人與老樹、莫逆相視笑。蘭亭苦冷寂、金谷羞囂叫。如何花之集、連席皆同調。前輩喜脫略、蒼松施群薦。應知佛法廣、衆生被廣照。願結善緣多、歲歲陪瞻眺。

飛來寺冷然亭

秋露已零泉更冷、蕭蕭落水水潺潺、巖巒突兀孤懷悄、此是人間何世間。

癸酉除夕時客餘杭山中

虞夏黃農已渺然、山中歲月更忘年。乍聞爆竹喧聲遠、始覺寒梅索笑妍。久病客疏容避世、急乘緩戒學安禪。近來俗事蠲除慣、賴問床頭壓歲錢。

甲戌清明寄示敏雲兩兒

海上無端又送春、江南三月病芳辰、夢中歷歷青山在、鏡裏蕭蕭白髮新。偶爲故家蒐墜乘、敢希文苑附傳人。歸期累汝頻相問、卅載天涯慣苦辛。

五十三初度歲甲戌

緣何有我問瞿雲、流浪人間百不堪。只覺孤兒常突兀、所悲茲世尚汪涵。繁華夢醒朝簪謝、塵累輕消野柳擔。煙水百重彌勒閣、幾時毋負五三參。

乙亥春日奉簡命佐典屬國金陵苦熱放衙後驅車玄武湖山深處袒臂濯足雲兒攝影余題詩脫卻朝衫狎水濱、愛於此處濯緇塵、科頭箕踞長松下、誰識衰翁是使君。

又

俯仰蒼茫天地空、靈蛇幻作一煙筒、閒來呼吸通天地、莫笑區區只熱中。

題僧裝入定圖

借得僧衣學坐禪、野狐笑我亦欣然。從知有相皆虛幻、欲破無明顯實權。花木四圍千樹柳、天人萬衆一蒲團。甚深禪定波羅蜜。親叩如來海會前。

廬山黃龍寺與青松和尚談禪時大雷雨耳爲之聾雨後交蘆橋觀瀑

聽雨黃龍寺、蕭然對老僧。疾雷驚巨喝、滅火渡殘更。我有過泥分、師言淨土生。青原七世後、曹洞此傳燈。

題程豔秋戲裝小影

新裝鸞袖鏡中看、故國笙歌夢已殘、畢竟羅癭懸巨眼、千秋身後像伶官。

丁丑除夕與關汪若挈兩家兒女游寶雲道

臘鼓聲中起暮煙、寶雲山畔聽流泉、兒童莫笑蒼顏老、明鏡明朝定少年。

丙子人日和胡伯孝草堂詩

未乞閒身借此歸、風塵老覺宦情微。入春花事都成夢、接座朋簪已漸稀。人日草堂原有托、平生湖海負初衣。一移偕隱知公健、指點鷗盟已願違。



題胡藻斌畫虎時庚辰春中日戰爭正酣

颯風怒挾沙石走、木葉亂飛千山吼。黃塵慘淡天爲昏、群飛百獸空林藪。空中湧出黃錦雲、神威赫赫稱山君。衝突咆哮誰能群、迷其識者飛將軍。爪牙符節垂青史、變化相生翔龍起。胡生粉水有異傳、萬里風雲來筆底、吁嗟乎、虎頭食肉今何多、狐鼠縱橫可奈何。願君驅策虎賁三千士、爲我洗甲傾天河。

將去職留別省府同寅并序時丁丑五月

去歲言旋、忝長省秘、安牘切磋之雅、文章道義之交、雖匪數年、實共晨夕、念協恭之誼、成留別之章、用誌永懷、敬希郢政。

八月趨陪似有緣、一時嘉會竟如煙。南歸王粲曾無效、老去馮唐頗近禪。祇以鞠躬報知遇、差能免過賴群賢。平生心跡堪持贈、江上清風不論錢。

又

水面吹萍聚幾時、久慚枯葉寄高枝。楸枰斂手寧藏拙、鷗鳥盟心退已遲。所不能忘從此別、爲言將去可無詩。諸公各取千秋業、容我江湖理釣絲。

贈弘一上人

早歲文章驚海內、飄然老去一孤僧。傳宗上繼南山律、行腳唯餘古蜀藤。嚴淨毗尼君獨善、挽回定劫佛何能。閒雲我欲還山去、壞色條衣染未曾。

和江霞公見贈原韻

偶從生滅看優曇、生本無因滅亦堪。世界洞然歸火劫、清涼何處覓煙涵。不除文字千秋業、收拾河山一甌擔。此事知音古來少、跛翁山客試同參。

自許山翁懶是與紛々物外宜  
買身花如解喚這多石亦能  
言一函可人淨掃明窗馮素几  
閒穿密竹山房鳥中殘年自有青  
玉管涼是竹鏡如未貧

世年仕宦垂素而歸白髮蒼顏  
又逢無處請劍南詩聊以自解

中宣八月岑以子昌

